

續金華叢書



靈巫品嚴
雀籜

表
勵
準



甲春康宗校
子永胡榭鋟

靈巖集卷一

續金華叢書

宋唐士恥撰

制

觀文殿學生特進授少保觀文殿大學士充萬壽觀使兼侍讀
提舉秘書省制

門下晉左棘以貳公式重內祠之領峻延恩而勸誦更提冊府之綱
眷時舊弼之良夙畀文階之長方深資於殫洽宜特示於寵優咨爾
在廷聽台作命具官某賦資偉傑蘊識高明履操端方一出準繩之
正見聞淹貫迄無毫髮之遺蚤由簡知寢卽柄用攬天下惟幾之務
自謨明而弼諧懋賢人可大之功每夙興而夜寐方藉謀猷之告乃
崇廉退之方位表羣公職榮邃宇請勉從於慈逸禮未極於優嘉朕
思謹守文必先師古雖羣經具在粲大法以昭垂然萬變靡常尙隨
時而或異乃旁考百王之史亦洪敷列祖之謨參之四部之詳庶矣
無窮之應惟論道經邦之素非說河畫餅之虛成台切問之仁假爾

多榮之寵升華寅亮聿新命數之隆冠侍禁嚴益著精神之聚領壽宮而儀表奉列聖之衣冠與其共萬幾之繁是則恬一心之養式昭茂渥用廣多聞於戲皇祐邇英之臣嘗特咨於故老開元集賢之長亦宜命於舊人尙思殊寵之光益體詳延之意可特授

端明殿學士提舉江州太平興國宮授昭慶軍節度使知襄陽府京西南路安撫使制

門下建六纛以宣威允謂詩書之將總十連而作牧式憑畿甸之封眷時秘殿之英人詔真祠之祿茲籌邊寄用屬仁人播告治朝亶孚羣聽具官某學爲有用姿擅不羣錯節盤根惟若新斲之發輕車熟路曾何駿足之留曩從甘泉繼翔琳館職號清閒之燕人思獻納之忠脫略事爲人焉均佚屈盤謀略深用惜才維茲襄漢之區實迺疆陲之境匪賜履撫綏之地振輕裘容與之風人艱其人實遴于選乃開方面用釋恬居練穀旦以登壇指蒼溪而錫鉞朱輪畫戟日凝燕寢之香絳節碧幢霜凜元戎之乘式副兵民之寄共觀師帥之賢於

戲方當靈臺偃伯之時散牛馬而橐弓矢應念峴首懷人之德安邊境而立功名

光山軍承宣使樞密副都承旨授寧武軍節度使領閣門事兼客省四方館事提舉皇城司制

門下建旌旄而制闔式彰上閣之隆備次邸以肅賓併總周廬之重爰命蕃宣之寄人將宥密之言肆惟顯績之褒庸茂殊榮之寵我有煥號人其樂聞具官某允號智囊恪持勁節精明莫及能俱畫於方圓動作有常殆不渝於尺寸蚤登名於勇爵旣騰譽於壯年周旋奔奏之勞密勿樞機之命朕飭賓儀而增勢重禁旅以分權視書館以儲才九重辰共均殿巖而設儆萬雉天臨外嚴臚邸之修內肅交闕之俟是皆立政之所急宜其圖任之實難思得勇敢行義之人以兼先後禦侮之寄載酬英望用壯本朝繇固始以承流指闕中而出節新大纛高牙之建式葢軍容爲九賓千列之光益嚴國體以彰蕃錫以表精忠於戲漢謁者之亞二臺蓋恪司於嚴陞周宮正之比八次

實祇戒於重門尙思畀付之不輕益勵肅共而無射

朝奉大夫給事中特授武康軍節度使簽書樞密院事制

門下授齋鉞以總戎爰秉六旌之重陟機庭而經武旣聯兩地之崇
瞻惟青瑣之才猷佇倚紫樞之績效用假登壇之寵肆開專面之儀
誕告治朝亶孚羣聽具官某宏才剴劇厚德鎮浮不剛不柔坐致中
和之福允文允武俱全左右之宜頃居封駁之司存綽有飛騰之聲
實茲遴心腹之選歷觀筆橐之班疇若可庸乃其有濟願合登於廊
廟爰晉處於機衡維今本兵之司擬漢太尉之列自唐代胚胎於名
號至我朝備具於亞承元魁差一相之尊列屬亦貳公之重蓋房謀
必俟如晦而決且裨創是基子產之成譬諸同濟之舟儼若相須之
輔原興國簽書之制故事昭然比天禧留後之兼新榮侈甚肆出茗
溪之節具頒英蕩之華假武臣傑特之儀壯右地雄深之略勉思異
寵益展嘉猷於戲五大在庭爾旣聯華於近輔七命賜國爾其專賞
於干旌茂對寵光采殫忠力

龍圖閣直學士通直郎提舉佑神觀兼侍讀授昭慶軍節度使
鎮江府駐劄御前諸軍都統制

門下錫齋鉞以登壇爰易儀於武裝護將屯而列戍用恢略於和門
睽時延閣之英亟著通儒之望輟帝幙橫經之粹釋琳宮詔祿之優
宣雄建於節旄肆寵綏於戎旅渙揚大號孚告庶工具官某策略敏
明器資淵詣擅晉室謝安之蘊施無不宜負漢廷賈誼之才學爲有
用維早郁於聞望乃深簡於眷知且西清列閣之嚴旣冠從臣之著
而北門入說之重每須大道之陳優游京邑之珍臺恬養沖襟之素
稟式方衰於敵運宜無怠於帝謨時維細柳之屯有在南徐之地烟
清萬竈人飽習於黃間風靜五旗令自嚴於青幙思得有勇知義之
士以備折衝禦侮之方是用輟自禁廷易之右列出茗水遙班之節
壯元戎先啟之行粵在咸平若水曾移於並野稽之慶歷韓琦首授
於秦邦僅易廉車未隆明命茲煥白麻之寵將觀素學之施於戲越
從南渡以來方啟備江之戍爰洎嗣興而後嘗掄舊將之門儻劍佩

無間於兩塗則彝鼎俱傳於萬世

太尉昭慶軍節度使授開府儀同三司鎮東軍節度使制

門下參揆路之班聯鼎新命紱尋將壇而告戒晉易節旄睠予尉府之雄夙護元戎之重茲焉進律擬以上公是爲右列之榮亶布明廷之著具官某山西勁氣婁北英躔忠根厥心義方於外在山猛虎邊徼懾乎威聲當道老羆草木知其風概七縱七禽曾莫可爲之敵百戰百勝幾無以書其功錯節屢更一心無撓漢鉞唐旌之夙秉呂韜黃略之無加陟此上卿冠於右序閱星霜之既久藹譽望以益隆是用異乎弁袞之流超厥儀華之錫九命加賜卷蓋高擬於面槐三台爲天階亦仰符於拱極上吳興之故綬出越絕之新麾往服異榮日宣令聞於戲鄧隲創東都之典朕旣殊願遇之恩子儀久中令之班爾必厲恂忱之德前修可跂嗣寵何疑

鎮南軍節度使提舉江州太平興國宮授太尉鎮南靖江軍節

度使充醴泉觀使制

門下升尉府之華爰比崇於兩地疊將壇之拜用增壯於六旄晉使
領於殊庭奉班朝於禁里渙揚典冊孚告臣工具官某才紹三明智
高七縱稟山西之勁氣援桴每念於忘身應婁北之英躔決勝有如
於破酌勳屢藏於盟府勇獨冠於和門公朝五使之階爾旣躋於穹
品版圖列等之鎮爾旣度於常邦載咨均佚之優尙起念功之切儻
吝褒嘉之意曷殫忠力之酬是用一開久曠之儀兩錫非常之寵惟
烈祖肇新於勇爵漢公乃長於武階雖藩方卓建於高牙唐典或兼
於錫鉞仍領豫章之纛更班桂管之麾啟冠號於琳宮爲顯榮於弁
列以䟽異渥以重神京於戲自右而視左班此儼政鈞之隆貌因前
而增後節此光制閩之舊儀益體朕心不忘予眷

少師昭慶軍節度使授太傅鎮東軍節度使制

門下巍然公傳之崇跨班聯而峻陟魁若節旄之易新旌鉞以具頌
瞻予寅亮之賢久亞範模之任升華一列加律巨藩用明顧遇之恩
誕告縉紳之著具官某詩書耆耄仁義襟懷華髮元龜綿國壽於箕

翼細旃廣廈新帝典於勛華屢迪謀謨愈隆聞望次三槐之論道卓
冠孤卿先十乘以從戎夙開將幙歲不同而月異德彌劭以年高且
優游暇裕以自修蓋切磋琢磨而弗置屬予浩歎念爾難能官不備
惟其人於今則可後所是著爲令有典常新超周邦召保之居膺漢
室卓公之任上吳興之錫綬護越絕以殿邦兩隆劍佩之儀高在疑
丞之表往膺異渥深顯令猷於戲三夏享元侯朕旣益隆於禮貌九
命加賜卷爾其尙勉於進修儻位極於羣臣亦君都於顯號

皇叔授光山軍節度使同知大宗正制

門下峻將壇而出節望式重於維城申王社以苴茅任載參於糾族
有嘉季父夙翰皇家咨舊績於蕃宣錫新榮而董正渙敷丕號孚告
庶工具官某懿毛畢之昭視間平之履身端行治自規圓而矩方學
富問充若珠輝而璧潤屬承流於龍水益騰譽於金枝動惟法度之
遵蔚爾親賢之望朕酌成模於祖憲念歸報於文孫維景祐之設官
思同倡於九族暨熙寧之報本蓋有嚴於大宗如麟趾以親親畫涇

陽而世世茲恪遵於故事俾並對於寵光漢綬金佗爵遂超於庶姓
周宗瓜瓞德有表於諸姬顧特重於委延庸采增於榮遇專制維城
之闡一新大纛之儀匪台爾私若古有訓於戲觀市垣二星之象朕
惟謹於法天考本朝同姓之王爾尤光於襲爵往毋忘於標的庶永
賴於維持

皇叔祖光山軍承宣使提舉江州太平鎮興國宮授昭慶軍節
度使封安定郡王同知大宗正事制

門下百世不遷之宗肆襲開於王社十乘啟行之旆爰申正於族盟
迺瞻宗藩最稱德齒式合追崇之典爰疏疊用之恩誕告外廷亶孚
羣聽具官某溫良毓質肅哲禔身儼若成規不越準繩之外鏘然遠
韻自諧律呂之和曩宣化於浮光益騰徽於令譽姑詔外祠之祿曲
從恬養之私朕嗣守丕圖緬懷大業服藝祖開基之烈垂之萬年原
熙寧襲封之規凜若一轍用疇同屬弗替宏模光映花章畫涇陽而
啟宇風生蘭沓聽族夏以保和雄我宗藩介之錫命指蒼溪而出節

練穀旦以登壇油戟前驅如授漢廷之鉞千旌顙賞有光唐將之牙
以壯維城以隆繼世於戲爾從見於清廟有翼不祧爾待祠於陽郊
式嚴升侑儻無忝於文祖庶以強於周家

誥

秘書監除中書舍人誥

勅朕恪承祖武庸謹政原維元豐六典之修備李唐兩掖之建萬幾
可否太宰詔王內史又詔王列職顯榮三公曰府九卿亦曰府別掌
紫微之誥他如青瑣之郎每難其人疇若予選具官某君子溫其如
玉大雅卓爾不羣兼文學政事之科蔚爲殫見中規矩準繩之度允
謂端人夙儀則於清流久踐揚於華貫藹乎譽望簡在眷知曩魁秘
館之英實表儲才之地弱水三萬里從容丈室之仙冠者五六人涵
泳石渠之澤粲壁府星辰之象舒木天日月之光兩兼清要之榮肆
茂晉遷之寵翻階紅藥喜霑雨露之新起草黃麻聳聽風雷之厲儻
朕命若絲綸之出則汝才式喉舌之宜

大同軍節度使提舉佑神觀除宣徽南院使誥

勅亞樞府以疏榮式侍燕間之地面使華而作冠聿新希濶之儀服
其名當知承休將美之隆異其寵何必膺任昇權之重輟汝殊庭之
奉陪台清禁之游具官某肅若禋躬凜然行義積糾旅董戎之效彰
譽處於和門秉捐軀報主之忠著勤勞於弁列闕台淵慮爲國蓋臣
雖高牙大纛之榮旣出雲中之節而閒館珍臺之佚還爲轂下之游
乃未快於公言庸肆開於殊渥有居近密庀職宣揚維後唐創號以
來若開寶兼官之重顧累朝用爲成憲在儒臣尙謂曠恩遠追元祐
復置之明復爲今日特異之寵益思朕眷永肩汝心

禮部侍郎除右散騎常侍誥

勅貳曹雖春官之最清要亦爲具員吏掖省獨右貂之久闕欲以待
非常人睠時獻納之英采著操修之粹與其助宗伯而舉明備之典
孰若邇朕躬而加切磋之功庸新最密之聯期獲相觀之善具官某
詩書襟度仁義步趨本乎沖遠之姿加以淵源之學肅雍四體超然

大雅之不羣酬酢萬爲湛若中局之止水蚤膺簡遇寢陟華塗左右
夷宗旣恪修於天秩周旋夔奏又迄致於人和高振名流綽有令譽
朕念守文之不易欲求助已而未遑苟獨學必至於寡聞且輔仁莫
先於會友思近日新之德共成時敏之功是用輟從禮樂之司責以
琢磨之義矧情文素接識前王易簡之心庶敦學相資闡異日中和
之教尙勉修於厥職期有益於朕躬可特授

吏部尙書除參知政事誥

勅朕思謹萬幾任隆一相欲左右格天之業必高明識務之才資其
佐貳之能助此經綸之志疇咨卿列擢與政鈞具官某温其如玉之
姿卓爾不羣之操居多錯節庖丁之刃若新孔震巨撞大呂之律不
替蚤上鵬行之地寢開鵬翮之霄權衡天下之人才紬繹胸中之國
論能其小必能其大思之熟宜思之深用以彌縫造命之基庶亦攄
發通今之學原藝祖設官之意豈惟分趙普之權服太宗立賢之方
適以養寇準之望尙益殫於志力期大用以登庸

給事中除翰林學士誥

勅朕思近忠嘉用裨政理雖羣英在列每殫獻納之勤然一意會神莫如禁密之地蓋金炬尙容於卜夜而玉堂無過於代言事稀則心自優分切則情不隔當有從容之論裨於寡昧之思必也擇人庶乎獲助具官某學周經濟德稟溫純粹然瑚璉之姿叶以詩書之習徧更中外深著勤勞頃登青瑣之司蔚在紫荷之列外以彌綸於命令入焉罄竭於忠誠積有歲時是用褒擢加諸省掖實在內廷前席賈生朕亦何翅於饑渴北門陸贄爾其具敷於腹心是將觀輔佐之才庶共底帝王之績

禮部侍郎除翰林學士誥

勅朕疇咨賢路思近正人維北門典策之官得南省詩書之彥庶以啟沃朕心之密亦將發摠爾學之淵豈徒言語文字之間要亦疑丞輔弼之次具官某儒學望士俊選名流矧衰衷閱閱之深且淹貫綱常之大禮樂殆非凡職實佐正卿典章固異他塗況居近列蔚若論

思之譽關予簡往之衷且陸贄膺唐帝之知志惟忠赤易簡被太宗之眷名在汗青蓋百僚莫切於是司宜多士每欣於斯地殆亦六幕戚休之係兼一人非是之分其殫乃心毋負朕意

龍圖閣直學士中大夫提舉江州太平興國宮除端明殿學士

提舉佑神觀兼侍讀同修國史諱

勅朕率先惟謹學古是勤念中興三聖之規方圖約史而仰考百王之範頻御邇英思我俊髦叶于講繹改畀內祠之祿特輸秘殿之榮表在禁塗成此遜志具官某識宏以達學博而明足溫純深潤之辭可以揚無前之偉績得厭飫優柔之理每能告多識之嘉謨頃躡夷庚備殫誠悃俄養恬於釐祝姑亞職於河圖有惕朕懷未究爾用矧堯舜相承之典加之神禹之謨且經史不同之言折之皇祖之訓萬世所仰眇躬是資蓋期二者之交修當究一心而無蘊比之聽履上星辰之峻孰若納牖增日月之明與其簪筆效朝夕之思寧如執簡銷聖神之美優祥源之琳館與宿直於玉堂超職西廂升華北殿懋

迺講明之道宏予筆削之功往服殊休嗣班異渥

朝奉大夫權知婺州除華文閣待制兼侍講兼秘書監誥

勅秘書以省名崇儒也其長曰監昔所吝焉今以寵爾往敬朕命是爲冊府有貳有丞有郎著作之庭校讎之部麟鳳集奎壁爛悉爾之屬固爾業履悉使聽順朕繫爾嘉然監之列下漢卿一等華文有閣祖訓是嚴命所論思四松有典閒暇之頃從容乎經帷帝幙之內上發勛華之道周孔之思而斟酌乎祖道藏焉息焉遊焉出乎四部七略厥掌不凡足爲儒者之光爾來自名郡政務稔矣則必肅而通通而不紊朕實期爾勉之哉

左千牛衛大將軍婺州觀察使親衛大夫主管江州太平興國宮授監門衛大將軍湖州觀察使樞密副都承旨知閣門事主

管皇城司誥

勅我朝設官名實相叶西樞之傳命朱閣之相儀與夫重門擊柝之重實爲密近朕不輕畀今交命爾爾其勉哉有掌甚奧宜其削去常

階正廉車之任而升環尹之華以重爾選傳命則肅且給相儀則無不協萬雉之嚴又屹其九天之上八屯無譁則所以明陟者斯不濫矣察訪之列視文臣之論思階政未去則瞠若也茲焉真昇厥禮匪輕往思爾職毋替朕命

權吏部尚書落權字詔

勅朕恪繩祖武庸厲官修重名器而爲之方明差次以漸其進維元祐制六官之長不爲一等之文若西都守京兆之卿未卽真居之秩俟其積闕被以寵光具官某學博以才通器周而用利盤根錯節曾何頓刃之難大呂黃鐘每見聞聲之肆歷更中外深著勤勞頃試天官實持銓柄心如止水物無遁形朝夕論思莫匪忠嘉之道羽翼禁從直爲偉特之姿用進律以仍居蓋因能而專任升華而冠筆橐秉公以蒞權衡首漢廷九列之嚴表周家六典之重期殫獻納益罄謀

謨

詔

誠諭守令勸學詔

勅門下朕永惟事統祈進民心迪烈祖之宏模蒞橋門而首善師禮
恪修於先聖俾知崇儒重道之方古文爰發於上庠以暢尊經務學
之化矧是一時之異渥又惟創見於前聞豈徒聲音笑貌之爲蓋急
漸摩涵養之倡至於出日罔不承風載惟國家積累之基每切郡縣
布宣之意儒範必資於名俊學宮徧逮於遐陬雖其百里之微亦罔
一毫之間尙慮未明於深旨儻焉有忽於彝章或室宇庳陋而無更
造之心或生徒寂寥而蔑詳延之禮絃歌俎豆漫隨沒於草萊期會
簿書第殫勞於鹽米吏苟若此朕何望焉繼自今毋貳爾心勿替厥
德以教養表率爲大務以因循苟簡爲深尤勉思風厲之方我有褒
嘉之典其或罔悛前失曲護昨非青衿儻轉而上聞丹筆難從於未
減邦刑無赦汝悔何追更賴持節觀風之臣密譏固愚方命之輩故
茲詔示想宜知悉

誠諭監司守令務息盜賊詔

勅門下朕聞民生有性稟之於天未嘗不善然盜賊之興時乃間見何哉蓋衣食之迫切饑寒之交至恆心豈能終存拊安田里非監司太守與夫縣令之職乎一同千里十連之眾苟吾有以全安之則潢池之盜誰其忍之哉朕殫竭此心每願膏澤之而九重之遠何啻萬里捍焉其難浹也輕爾繇賦薄爾征取去其盜竊息其訟爭一事有底而民之被夫德者深矣從此有陟厲此有罰朕必行之爾其毋忽各宣爾力勿廢朕言故茲詔示想宜知悉

求遺書詔

勅門下朕右文稽古執道御今惟造字畫卦以來實繁載籍至開元集賢之目有光前人惜其寇煬之踵生乃爾焚散之殆盡惟我宋聖神之繼作每隨時練冊之肆求洎文風日盛於八紘蓋書府歲增於四部亶中興旣從而復古在冲人盍務於搜遺若孔壁奇文之藏或汲冢紀年之秘格之常典斯謂異聞至於九鼎之形模殆亦六經之鼓吹庶亦補於稽監時亦備於討論罔間幽微悉思包括四海博雅

之士六幕淹該之人毋惟私藏副我誠意其爲賞募則具科條故茲
詔諭想宜知悉

戒令文臣侍從以上武臣管軍都統制各舉將才不問親屬詔
勅門下朕嘗聞惟蕭何知韓信之賢惟鄧禹識寇恂之彥凡茲兩漢
之興實出二臣之力惟謝安石不遺於近戚惟范仲淹一洗於罪夷
蔚爲在昔之良規抑亦當今之善監蓋可用者要爲難得而灼知者
必務兼收朕念無平不陂之艱務思患豫防之實願士卒旣從於和
叶然統臨尤藉於梟雄惟賢知賢以類求類凡我甘泉之法從及夫
鷗弁之魁才其殫乃心毋負朕志昔臯謨每歎其難事而宣尼嘗勉
於爾知必陳選擇之方用作蒐求之據或善御眾而多多益辦或足
智術而凜凜莫干得人心則如冬日之溫能出令則若秋霜之肅下
至舉旗之勇悉歸舉目之綱雖武皇泛駕之云包含亦至抑祁老舉
親之善疑隙何生庶終得於真才用肆開於賢路故茲明諭想宜知

悉

戒令監司守臣條具州縣民間利病詔

勅門下朕以眇躬託於士民之上眷惟萬緒極彼閭閻之間不見是圖無遠弗届思欲輕徭薄賦息訟省刑民俗知向而俊乂多眾吏道永清而廉隅振舉文武有並用之術上下無不通之情旁逮百爲悉歸至當庶底三登之樂大開億世之基顧端居九重之深盍周知四海之廣爲究庶邦之正以參一道之中凡爾賜履持節之臣洎於剖竹專城之守耳目所熟接念慮之素經或拘於成法而未適其變通或隔於隱卹而莫爲之道達凡保眾安邦之術洎立經陳紀之方罔間細微悉歸搜討朕將闡大公之路開眾正之門先民有言詢于芻蕘况秉六條之詔皇極之稽謀及士庶矧膺千里之權其殫乃心以輔台志故茲詔示想宜知悉

誠諭中外之臣毋私薦舉詔

勅門下朕惟九州四海之廣庶員列職之繁凡升沈進退之攸分必能否賢愚之皆當極彼萬緒疚予一心在昔前王獨繇府署顧未流

不勝其弊至國朝遂析其權天官特守法之司命秩視薦員之數若
乃升名通籍脫選侍郎必先部使者之鶚書以及羣太守之剡奏至
京師具僚之外亦長官歲舉之稽行之有年通乃不倦矧若中人之
嗜利至於私謁之成風嘗憫積勞特恢數路彼李唐進士之試有蒼
姬里選之風維多覓舉之姦爰剗餽名之制施之既久咸謂至平然
事揚非比於言揚人弊豈關於法弊恆予中慮寓此明綸凡汝輔弼
侍從之臣膺朕心膂耳目之選莫匪探誠而深倚豈應小節之未公
安世不謝之心邴老舉仇之事極於中外一以準繩至於視察從違
修明倡率愈謹正邦之辨兼持賞罰之方朕必勉爲汝毋後悔故茲
詔示想宜知悉

清江先生集卷之...

...

...

...

...

靈巖集卷一

靈巖集卷二

續金華叢書

宋唐士恥撰

表

端慶節賀表

衍十二葉之休慶乾坤而震育永億萬年之命壽箕翼以天長時協
令辰歡均率土恭惟皇帝陛下祥鍾九祐德冠百王接堯舜禹之傳
更成湯之親受兼天地人之大實鉅聖之間生茂對昌期仍躋極治
五百里夷五百里蔡將壹歸仁壽之區八千歲春八千歲秋殆莫比
靈長之曆臣叨分符寄莫與嵩呼想麗日卿雲若仁祖稱觴之旦惟
泰山神鼎陋廣成修己之年

賀冬至表

新甲子之歷載兆陽和占斗牛之躔既更日度無窮福履四溢寰區
恭惟皇帝陛下育物對時與天合德神惟不測自然一氣之循周心
本好生尤重初爻之來復土圭景測玉琯灰通登靈臺以書莫匪太

靈巖集卷二
平之象吹黃鍾之律灼知有道之朝臣一障叨乘三呼莫與分化國
之照漸增晉晝之明受園丘之釐益迓乾亨之長

賀梟斬吳曦表

某月某日伏覩進奏院云云者聖神廣運太振當天妖惡伏辜曾不
累月同文胥慶奕廟增嚴恭惟皇帝陛下德合九乾統承千歲如川
方至十二葉之靈長猶日正中億萬年之珍貢宜茲叛渙亟焉剪除
不煩兵甲之陳大致旃裘之震臣欣聞馘獻莫尾慶聯夜瞻井絡之
區頓明乾度朝誦雞竿之令一正坤維

代真里富貢方物表

葵心北戶久懷航海之誠象譯南琛初上職方之奏畢翰誠於螻蟻
實慕義於衣冠臣中謝竊以興國悅渤泥之朝嘉其始至祥符偉注
輦之貢歎彼未來豈期從古之戴盆忽玷當今之同軌伏念臣每以
滄溟之中阻姑爲吉蔑之附庸下極熒煌莫記星霜之變斷根膏馥
第形賈舶之編旣弗登夏王山海之經亦莫與汲冢會同之解且西

鄰驃國尙効德宗鼓舞之懽而南境闍婆每續元嘉職貢之敬退念
陋邦之蕞爾獨爲大節之闕然臣是敢遙起三呼共馳一介隨貫月
乘槎之侶占迎秋從律之風效牽式啟於旄頭任士仰干於祿幣共
德天啓其明日合宜東西南朔之悉歸大秦寶多大宛馬多想禮樂
詩書之甚盛祈殿古人之委賜與榮玉版之詩書形容駭師古之圖
道里續賈耽之志恭惟皇帝陛下離明繼照乾健統天中國有至仁
自然篤近而舉遠小邦懷其德豈徒厚往而薄來乃至微臣亦知大
義法乎三聖矧更出於親傳令彼四方自式歌於來享某空懷辰共
莫與躬朝嗣屬國之封章自今以始聳陪臣之復命其教可知

貢土物表

正會休期敢後萬方之集爰閭式貢庸昭八熟之祥遙睇紫宸仰干
祿幣恭惟皇帝陛下接千歲之統閱四海之圖酌祖丕承壹用元豐
之名籍深仁薄取旣殊大禹之組纁其益無方時偕行不貴異物民
乃足臣叨符江國效禮職方川浴車盈賴叶氣致干之應銖積寸累

見小人向上之心

代守臣賀改元嘉定表

聖神御極三周再閏之年政治更端四揭一元之號祥風所布化日以新竊以漢文未表於歲時猶改後元之號武帝欲明於正朔遂標登封之年皆通變以隨時宜更張而盡飭矧慶元慕文聲之盛而嘉泰著代邸之隆洎乎開禧揭若日月屬茲解絃之旦新乎紀曆之名誕布絲綸徧翔寓縣采詩書之遺訓慕殷周之盛王將見麟之德鳳之輝百嘉順集有如川之增山之壽一德尊臨名與實俱人因天定恭維皇帝陛下明明在上赫赫當陽四三王之仁茂中興七紀之業五泰元之筭迓升平再登之年茲革故而鼎新蓋泰來而否往書標嗣歲爰冠美名臣圭璧叨分風雷竦聽斗標初指覺星宿之倍明日御欽承洎子男而如一

代安定郡王以下賀宗學落成表

教被宗枝創建親師之宇事勤工正迄新遜業之宮九廟增嚴八方

仰德竊以小侯立學僅成戚畹之良資二館育材未淑潢流之遠派
歷選前王之故莫如我后之朝繫人有生受天一理然教化乃聖所
任而仁義非學不充凡自后夔教胄子之餘以及司樂掌成均之後
莫急受親之義孰知崇理之方故間平爲豪傑之才而漢唐多宗室
之過今茲肇立直爲創聞茲蓋伏遇皇帝陛下道際三王仁先九族
雖大禹卑宮之儉每切謙謙然周家以宗之強獨惟汲汲識頤養爲
家人之要知菁莪乃麟趾之基謂金枝玉葉追琢之是先而鳥革翬
飛鳩僝之當急茲訓百孫之屬俾知六籍之依齊家乃治國之先灼
知原委修道實正心之要首及本支臣等忝居託附之親實被生成
之澤迪師友相先之效期盡爲君子之歸全天地不及之功將廣沐
聖人之化

代婺州守臣進甘露圖表

臣某言盛德昭天允格飛甘之露泰和溥海適臨須女之區敢因繪
事之成用贊史臣之紀竊以唐官品瑞蓋齊等於卿雲漢世標年亦

聯華於威鳳足以表升平之協應故每爲前牒之特書維吾皇臨御
以來多至治休嘉之獲不祧祖廟嘗瞻三秀之芝切近日畿且見屢
成之璽雖爲叶氣未極偉聞尙由動植之微盍顯覆臨之感獨此至
味敵醴泉之美晶華占夏晝之長被草木以生輝駭觀瞻之創見敢
藉丹青之毫末用撫萬一之形容庶關斧辰之嚴小借前旒之啟恭
維皇帝陛下紀元四號授策六禋湛恩洋溢於八隅深仁厚澤洪覆
歡歆於一德異瑞殊祥宜其有道之符著在無虞之世臣適當假守
親覲自天書玉版之端喜姓名之亦預信蘿圖之卜與上下以同流

代守臣謝宣賜嘉定十年統天具注曆表

嘉靖殷邦十見星霜之易承宣漢郡一蒙正朔之加班春恪奉於王
春授日必從於卿日竊以洛書協紀一被周疆舜歷在躬四敷禹迹
維是當天之統必歸乃聖之君矧我一王之興將及二星之數念往
時之更化旣四閏以標年雖巧曆莫窮殆如川之方至而象魏咸覩
又見月之始和太史之謹攸司靈臺之占厥氣奉天弗後應序罔差

繩繩氣朔之兩全井井歲年之各得旁協九農之務不聞毫髮之訛
下厚庶民之生舉無動作之忒乃肆班於郡國以式順於陰陽雖在
遐陬亦霑隆施茲蓋伏遇皇帝陛下對時育物以道御民欲設施不
背於慘舒故命官而推步欲惠澤咸周於遐邇故作曆以班宣致茲
王政之占天亦俾侯邦之得序密清臺之課日月合璧星如連珠分
方國之書朔南暨教東漸於海臣敢不恪遵成度廣訓黎民使作訛
成易之方靡有失時之事俾忠厚鴻龐之賜舉霑成物之恩

代翰林學士謝賜唐五臣注文選表

禁直九天方負非才之愧善文眾傳遽叨榮賜之恩示其斧藻之淵
源兼以蟲魚之訓詰竊以漢嘉王景之績賜以禹貢之圖唐旌大亮
之言班之荀悅之紀皆因人而示教使勉學以加思矧蕭梁帝子之
英極楚些詞源之邃高艷盡窺於前作殘膏遠丐於後來開元之士
五人李善之注一變儻曰雕龍之客爭先文豹之班臣筆札尋常言
辭魯鈍誤獲寶宸之眷俾從玉禁之游絕無黃絹之好辭少稱白麻

之明命自顧才殊於八斗焉能筆掃於千人惟茲傑製以偉編加以
明言而眾見俯矜愚分簡在皇心恭惟皇帝陛下時御六龍曲成萬
物念內制尤多於體裁獨斯文稍具於條疏示以規模迪之種績臣
敢不悉心勉勵仰德高深若杜陵訓子之詩務加精熟誦曲禮拜君
之賜敢後服乘

代中書舍人謝賜金帶表

臣某言伏蒙聖恩賜臣金帶者綸省庸虛方負非才之愧身章粲爛
遽蒙超等之恩深慙小己之私不稱匪頒之重臣中謝臣竊嘗觀國
家御下之法識器服藏禮之端不著多儀各爲一等惟是致身紅藥
之省接武紫荷之聯雖旣與漢廷九列之崇然未兼唐官三品之飾
必有非常之睠乃膺特異之頒歷誦前聞備譜故實長春醴賚僅傳
開寶之年大筆簡知間見祥符之歲斯謂濶希之典以待英傑之流
如臣志乏精堅質非渾厚居而強學鑄莫遂於顏淵出以事君礪深
慙於傳說謚隘陪閔彥誤入化鍾鳳沼判花寧有同心之斷彤庭書命

終無擲地之聲忽拜誤恩莫安揣分隨班中諫驚改觀於常儀侍省
夕郎歎均榮於兩掖靖惟么膺盍此叨踰茲蓋伏遇皇帝陛下龍德
正中鴻慈溥博歷觀周道獨先馭幸之恩度越漢皇粗見解衣之惠
每異儒冠之顧誤深愚分之憐傑閣肇新昔既述寶元之榜垂魚僅
錫今更踰李絳之榮臣敢不鏤骨銘恩書紳圖報服而拜賜知眷逮
之殊常束以立朝誓身捐而不顧

代提舉實錄院進修孝宗皇帝實錄表

臣某等言業紹中興丕赫三登之化道光載嗣聿編九閏之年鋪張
信史之成密勿嚴宸之覲竊以本書嚴於大漢蓋祖春秋之規實錄
顯於有唐每先紀傳之作矧上聖重華之盛屬神孫述事之明粲然
累牘以成編爛若有光於邃昔恭惟孝宗皇帝心傳堯道治廣文聲
勵精臨照之初抗意恢張之表法度彰禮樂著初無革故之勞天地
觀日月明自有鼎新之效蒐羅俊乂不拘於常法修舉刑政振起其
大綱仁以撫民而勤恤於至微義以整兵而必期於可用罷臺之儉

無乎不服太阿之柄久而益神凡金匱石室之秘藏迨壁簡科文之
未見屬重明之出治監成憲以欽承旁招副墨之英共探汗青之粹
根本著廷之作網羅私室之遺旁該百度之變通下逮諸臣之屢效
月繫時繫以年繫慶曆數之無窮大書特書不一書歎形容之莫盡
用著不刊之典永貽罔極之傳茲虔卜以丁辰庸上關於乙覽文從
椒掖陋漢注之無端禮備寶藏與舜華而密映交輝九廟森護萬靈
恭惟皇帝陛下離照當天乾剛御極緣車慶侍昔已造於精微丹史
備書今聿加於潤色致茲鉅典粲在明時益文治於聯編有繼東都
之盛仰湯孫於奕世愈揚前烈之光臣等獲際昌期幸窺丕範於萬
年而繩武深彰紹述之勤作一藝以襲經豈有編摩之力

代右丞相謝賜御書說命中篇表

淵衷遠覽期取監於商書帝藻特頒俾勉希於前哲俯慚愚分莫稱
寵光竊以世祖之頒細書徒風行於勤約文皇之賜飛白僅意屬於
股肱未有探往行於前經示聖心於俯賁事光邃昔道覺後知仰惟

商室之繼興無若高宗之最盛誠通天地發於精禛之交道際乾坤
著在便蕃之命矧是中篇之告后尤爲異代之良規惟聰明必在於
憲天惟治亂每生於庶士謙謹罔容於有善豫防當戒於不虞蓋臣
賢上智之明謨亦平世持盈之要論維此忠嘉之所屬當由俊傑以
能然如臣叨任棟隆包羞鼎養雖累年更歷粗知保治之甚難而一
意贊襄每冀竭誠之有補曾謂寶跗之灑俾知前哲之修茲蓋伏遇
皇帝陛下離照當天乾剛御極法宮親事曾無自聖之心肆筆成書
大闡不言之教發碩輔進王之簡開小臣趨善之門臣敢不厲志奉
承伏膺啟沃光生蔀屋駭奪目於驪珠思濟巨川願悉心於龜鑒

代童子謝秘書省讀書表

臣某言伏蒙聖慈令臣秘書省讀書者穉年觀國慙非早慧之才明
緯疏恩俾誦秘藏之簡欲其有造開以多聞臣某仰咸平邵煥之恩
洎景德晏殊之澤端我寢昌之旦讀乎未見之書如臣者不善養蒙
焉能求益寧有百藥誦鄔子之博初無甘羅悟不韋之奇曾謂誤恩

俾從藏室遠發中經之奧近窺肆筆之成青裾朝拜於木公朱錦夕
榮於藜照連珍羣玉接采九鷁恩重孔門將終保互鄉之往事如東
觀蓋上追黃香之游超凌尾弱水之蜚優渥過舞雩之詠茲蓋伏遇
皇帝陛下與參化育樂長人材念愚衷蚤慕於簡編故遠慮欲培其
芽蘖致茲瑣薄獲此叨踰臣敢不周覽瑰奇旁蒐隱奧醯雞陋見殆
未免金根之譏管豹竊窺烏能及朋字之正

露布

擬河北宣撫使平貝州露布

臣彥博等言四海無波共樂漸仁之化一夫不軌空懷負固之心雖
三軍之律至勤貳政之臣然六旬之叛不出孤城之守迄絕纖毫之
援適彰宗社之靈蓋羣黎爭父母之歸寧小醜遂豕蛇之食用正鯨
鯢之戮莫逃斧鉞之誅國家大業無疆重明四葉書同文車同軌恩
波匝雨露之滋仁也柔義也剛政理若日星之照曾何狂卒敢啟亂
心本饑年流落之餘旁緣戎旅倚世俗妖訛之謬誑誘羣愚下胥兩

協其僞謀本計旁連於鄰地斷浮梁而擅河朔由正旦以嘯狐狸惟
天網之難逃乃賊徒之自露倉皇無策狼狽圖全刦庫兵而囚守臣
僭王號而易正朔致茲叛渙達於聽聞陛下奮發乾剛昭明師律環
鼓旗而肆擊屬樓櫓之素堅旣築拒闔乃見焚於秉火或爲內應復
中阻於專攻尙稽膾縷之誅用急焦勞之顧謂蕞焉小壘曾閱月之
未夷而密彼邊疆可頓兵而不戰臣忠懷斐度憤切有苗願膺專闔
之權俾効捐軀之分皇皇列纛蔚爲啟乘之光烈烈中權得遂從宜
之便謀攻九地誤敵多方設伏西門俾隻輪而不反擣虛南壘信妙
算之無遺旣致戮於守陣亦固圍而拒戰衛社忽興於蛇槩倒戈乃
出於火牛尙逃遁以求生俄係纍而就死檻車致命正天街九市之
誅鶴唳聞風震磧漠八荒之族一寧邊徼四赫皇靈迄無纖粟之虞
益固迓衡之業斯皆皇帝陛下深仁無敵至健自強在齊民疾痛之
微悉聞淵慮當邊塞喉衿之要敢緩天誅役不淹時戮惟元醜占騰
祥於析木星宿倍明息衽革以橐弓韃裘自聳臣等無任慶快激切

之至謹遣某官奉露布以聞

擬權熙河經略禽蕃人首領露布

尙書兵部臣某言屢虔邊徼旣成怒臂之無知小效天戈竟破狡謀之三窟蓋違理者神人之共憤而背道者明聖之不容旁驚邊塞之心上釋裕陵之怒國家當天七葉享祚百年蓋子視於多方亦海涵於萬寓朔南暨乎聲教初無遐邇之分仁義極其漸摩敢緩凶殘之取蠢茲小醜恃彼孱心跳梁躑躅者久之於邑恚忿者眾矣語其最巨斯謂巨容陷我一城仆其魁武募賞嘗聞於先世圖惟敢啟於陰謀輒連平夏之師竟指臨洮之域版築大興於力役干戈擬逞於雄心謂合謀并勢以俱來庶封豕長蛇之薦食然淵謀廟算之所出知接手就縛之無疑一介朝馳了了目中之敵三單夕起明明聞外之權左右手知兩將之和赤白旆皆萬人之勇一鼓有同於拉朽四奔盡殲於臨流僑如莫假於游魂孟獲竟從於生獻盡破他酋之膽合騰北闕之章冷風極青海之遙赫日破鬼區之暗且始謀之不合意

弁舉之難當揣其私心料彼愚見謂寡固不可敵眾詭姦計之萬全
然天定亦能勝人奈雄圖之自濟出其不測成此非常斯皆兩宮深
仁上格於皇天得道每形於多助不從中制惟責成功先人奪心賴
合謀之竟售以少勝眾喜四塞之盡清下叶雋功詎逃大戮

擬荆南路宣撫使平儂智高露布

臣青等言女側陸梁卒致漢師之討盧循猖獗難逃晉室之誅蠶爾
蠻蜚毒茲南紀央央隼旆啟十乘之元戎烈烈牙璋畀萬蹏之突騎
亟清嶺表誕布王靈國家子視民編天臨裔服朔南暨乎聲教初無
遐邇之分仁義極其漸摩敢緩凶殘之取矧在靈旗之指曾何前敵
之留王則負固於一城旋歸受首元旻藉資於累世卒亦來臣茲焉
蜂蠆之失防赫若鷹揚而奮擊醜爾智高之虜桀焉交趾之藩偶稽
梟獍之烹輒肆螳蜋之怒象琛祇貢期借助於中華狼子野心竟不
逃於明見竊攘山澤招納逋逃陰含短蠖之姦欲肆長蛇之食譎其
眾以焚巢之酷給吾邊以告糴之虛忽竟下於鬱江乃亟戕於邕管

遂張皇於虐倖亦僭擬於尊稱正朔建其偽名官號比之上國偏屬
升平之久少忘豫備之修連破堅城痛吾民之塗炭進圍廣府期彼
志之滔天賴金湯有不拔之堅然雷電之無前之掃借忠殞於非命
敢修望而退兵擁子女以謹歸縱火炎而肆暴赫乾剛之奮發奉師
律以虔劉六纛風生先斬罔功之將三軍股栗盡輸赴敵之心將奪
險以疾趨反戒糧而示緩果昧必爭之地斗臨不測之兵魄喪魂驚
遂倉皇而送死旗當鼓接猶跳躑以求生麾精騎以互馳東飛矛而
莫逞威如破竹膽落聞風旣夜遁於渠魁遂朝清於截海釋囚復業
頓還百縣之農桑折馘數功爰及萬人之京觀交震雕題之俗增明
星紀之躔斯皆皇帝陛下默秉廟謨獨操睿斷念何辜於黔首乃墮
兵鋒運無敵之神機亟清妖祲勝憚一鼓眾不三單屹銅柱於南垂
永作地維之鎮聳葵心於北戶愈虔日禱之瞻

擬川峽招安捉賊平王均露布

尙書兵部臣有終等言小校何知遽受羣愚之迫神威所蒞定無天

討之稽矧維羸肱決射之徒乃有背上忘恩之事是之可忍毋乃太
荒國家並用剛柔初無吐茹仁義四漸於六幕賞刑迭出於萬幾况
茲効命以衽金要在秉忠而知禮凡服飾鞬囊之末洎炙漿飫勞之
微何足動心乃敢倡亂縱馬轡以售姦計戮主將而成凶謀奔惶符
節之臣創易歲年之號竟屠漢壘亟走劍門賴天險之難圖阻兵端
之將逞屬上聞於事緒爰申命於鼓旗清壇有助順之師一戰幾顯
庸之錄叩蜀莫窺於城壁嘉眉大合於干戈叢然假息於頃時昧若
逃魂於萬死開門僞遁希小剽於銳鋒緣堞竟全姑略從於養力離
其脅誘靜此氛塵連收再勝之功洵達九重之奏數道爭飛於矢石
孱然猶事於宴歌炎火一施敵樓隨盡示之生理庶此全功雖慙夫
懷悔禍之心奈狡者繫首邱之念竟焚召笥莫效降幡甚雨淋漓顧
未遂先登之勇壯夫感慨竟誰爲難犯之鋒共知瞬息之危猶冀遷
延之福力焉巷戰樂矣烏聲一夜沈沈覺紛拏之頓肅蜀江渺渺知
倉卒之弗航竟從醉飽之餘殲作梟獍之伏斯皆皇帝陛下聖神廣

御文武兼施萬里鼠偷竟不逃於明見三單鷲擊終無敵於奇兵迄
平井絡之區益茂蘿圖之業

擬熙河經略使復洮河露布

尙書兵部臣某言斷匈奴之臂漢家綽有淵謀守四鎮之城唐帝亦
推上策所以殺羌戎之勢使之無侵軼之虞蓋兵家萬全之圖關人
主九重之畫國家深仁同視大業無疆英明特起於一時憤觸蠻之
未斥經緯乃從而四略期遵用於已施念絕交離黨之奇實保大定
功之要雖中國四夷之勢振古則然矧真人同軌之模於今或未伊
焉羌類比此夏疆前世象以金縉成勳未大茲地倘能臣妾醜域自
平爰命小臣俾攄成算不壹戰以使之自擾拊大酋以冀其悉來封
疆日闢於召公謀慮勢均於充國逮幾成於事緒俄小覷於偏裨救
敗之師不可當戰焉旣力出疆之任無所制罪也敢逃兵威大振於
鬼區職貢訖惟於人面裴度終平於淮蔡蓋一定於廟謨段明遂弭
於羌戎亦多資於眾力風動遠臨於青海雷轟自懾於靈旗茲蓋皇

帝陛下智勇俱全規摹素定出奇謀於堂上料狂敵於目中推轂明
明旗鼓遂從而無敵兵威凜凜心肝爭奉於至尊在臣逃稽緩之誅
由下靡遺餘之力

擬兩川招安使平李順露布

尙書兵部臣繼恩等言坤維盜弄何勞蟣虱之誅師律中行卽遂創
瘼之復訖莫蠶魚之國旣安參井之疆用寬西顧之憂亟上北門之
捷國家鼎來帝運離照鬼區大一統以同文奄八紘而有截顧維益
牧小遠神京然深仁厚澤之漸摩與時俱化迺曲見私心之反側動
眾以言首謀幸厭於天誅脅附更思於扇亂適持節不知於撫定致
號狐益遂於張皇城壁屢隳官僚踵戮痛吾赤子何忍墮於銛鋒憤
爾綠林敢肆行於虐燄皇帝陛下赫然出命昭若選才推轂惟專事
靡容於掣肘釋囚兼用罪惟問於吞舟甚昧愚心敢爭天險屬旗鼓
兩明於將鉞乃聲威大折於妖徒矧東川素備於金湯蓋巨幹豈移
於螻蟻棧路何虞於來往王師亦務於驅馳雖凶旅方興若可游魂

而假息逮天威一鼓悉皆授首以摧肝電掃無前風行孰禦破竹實
三單之快刈鯨無半瞬之留錦里依然重被吾皇之雨露雞竿肆及
盡還昔日之農桑人違黥墨之災罪止渠魁之取雖支黨亦歸於禽
獻惟眾心本荷於皇明岷峨還徹底之清星宿有倍常之潤臣叨膺
授鉞每誓捐軀曾何三略之知常愧六韜之學幸賴諸軍畢力羣校
協心更由神聖之威獲致纖毫之效貪天何敢贖罪既多

靈巖集卷三

續金華叢書

宋唐士恥撰

檄

擬延州問夏國省州檄

年月朔日延州問夏國省州曰蓋聞聖主執賞刑之柄烏有所私文告居甲兵之先盡其在我矧君臣之分素定且是否之理甚明姑少紆靈旗之威庶不貽裔服之禍國家當天五葉享祚百年中國有至仁自然篤近而舉遠小邦懷其德豈徒厚往而薄來唯明王如初之清明在外服奔趨而儼恪夫何一介敢犯多儀固嘗置辨以盡其辭乃爾負義而難於對俾之自反敢此無知虔我邊陲輒形奮臂屈吾詔旨猶覬革心不獨起飾非之辭又妄生歸過之語宜褚衣之輟賜亦正朔之弗班苟有人心當知羞惡豈期狼子反欲鴟張肆長蛇封豕之貪犯細柳棘門之戍莫解神人之憤兼興夷夏之師射月夢開奉頭鼠竄尙從含垢未欲洗瘢某叨與左符每思大義擬劾枕戈而

待旦亦期決射以羸肱馬革裹尸深慕古人之勇彘弧垂尸雅知男子之生激烈懦衷蒐羅英略畢起報仇之眾共揚問罪之兵然慮傷天地弁容之仁姑少忍風雲叱咤之志一興款語三叩忱辭况旌麾亦在於邊陲勢分蓋形於上下易地而論忘恩者誅苟其堅衽革之強將再蹈前車之覆當命營平之將難稽蠻郢之刑猶未臻迷復之凶庶可緩成師之出投誠儻至洪覆何言

江南西路提點刑獄諭所部檄

年月朔日云云兵革藏於私家夫子謂之非禮刀劍賣而勸稼渤海復爲平民簡牘所明規繩可尙且習俗有時未正則訓諭於焉當行敢罄我心少裨爾見維蚩尤之啟兆眾械始基若子產之立言五材並用然人主黷之尙爲不可矧庶民藏焉殆未適宜聖有格言戒之在鬪孝之爲事夷也不爭耕食鑿飲之餘惟知鼓腹仰事俯育之暇合事學文庶全髮膚勿徇血氣且喜怒實爲難制而暴狠發於無端苟其具之素存必此身之易陷大有干於法度小未免於過尤苟念

謹身自應買犢使吾言之不聽當行法以無私然文告之宜先開首
科而使免儻翻然知過家無鶴膝之儲則坦若安居人有龜齡之保
矧此多虞之起自夫七札之藏覆轍在前後車合戒噬臍莫及蚤計
當思聖朝開禾覆之仁德政徧雲行之澤何獨自貽於伊戚要當遂
覺於昨非父兄弟相飭以馴良井里親戚永無於災禍各保賦年
之永同躋比屋之封當職濫奉詔條思防民患不顧言辭之無當力
祈仁壽之交修勿自蔽於頑嚚以卒歸於羞辱

陝西轉運使橫山部落檄

年月朔日陝西轉運使諭橫山部落曰蓋聞民惟從惠必歸明聖之
君夏以變夷乃合春秋之義并期二者形之一言國家超振古之邦
開無窮之祚厚澤溢於八表滲漉深仁大度極於九垓包容無外昆
蟲至於凱懌草木遂其生全矧在歸誠必敷異渥顧禮義積衣冠之
習而賞罰無毫釐之差凡五葉以百年咸四王而六帝赤子舍父母
而何往深淵蓋魚鼈之所依此理甚明不言可喻橫山番部本從中

國偶墮戎疆鼓旗居諸部之先戈盾作萬夫之最用之叛換惜此驍
雄矧役服之尙新亦風聲之未遠當爲反旆是乃首邱况諒祚資稟
昏狂性情率易淫泆無別殊虧謹重之威庸暗喜讒時有偏私之聽
名稱自侈殺戮不辜雖云蕞爾之邦曷事辱焉之主離心自起明見
誰先且巴渝亦助於漢師彭濮嘗從於周后歌舞不替簡冊有光維
邊備在我以日修藩落於今而歲至與其展用於鋒鏑曷若歸心於
帝王金犀卽賜於昕廷爵祿永膺於明命名姓與史官之紀子孫爲
樂土之人舍是不圖又將焉取

熙河蘭會經略使曉諭西蕃邈川首領鄂特凌古檄

年月朔日熙河蘭會經略使告西蕃邈川首領曰蓋聞帝王博愛之
仁雖重靈旗之指臣子亂常之罪當嚴齊斧之誅以其素列於外藩
姑爾先施於文告宜及幾微之地亟加省察之心國家不冒普天尊
臨截海八方同軌談消烽臥鼓之娛九譯來王極航海梯山之遠維
錫祚再周於甲子而致平高軼於五三雖專仁義之修不廢甲兵之

備矧在賞刑之際罔差毫髮之微凡曰剛柔會何吐茹邈川首領夙
殫忠向世長戎邦被純纁帶金犀每厚鴻臚之賜執干戈衛社稷屢
爭靈夏之鋒錫爵有加於汝何負爰自襲承之後忽開猖獗之端侵
軼邊疆結連鄰國將肆窺箭之志莫知覆露之恩昔征嘗欲飛揚卒
成困迫此已然之明鑒乃自蹈於覆車識者爲之寒心義士聞而扼
腕盍從一鼓俾就七禽維兩宮奕忠厚以四漸均華夷而同祝念玉
石俱焚之未免在疾瑕小忍以何傷姑少緩於師徒俾三思於禍咎
儻尙知於改易諒不失於拊存事或起於他心頑莫鑄於惡子當自
明於丹赤毋入混於薰蕕竇融致討於隗囂益堅歸漢之志吐蕃助
誅於天竺應無背唐之心宜亟厲於戎昭會大陳於馘獻斃茲叛渙
正汝君臣若乃螳怒自矜狼貪思逞結憾至仁之主甘心累世之讐
兵出萬全命定遠營平之將王斯一怒正藁街蠻貊之誅狡穴難逃
噬臍何及

鄜延路都監報威明山檄

年月朔日鄜延路都監報威明山曰中國首四夷足盍可岐觀見善
明用心剛乃臻大道旣信義交輸於兩地宜死生如在於一舟革故
鼎新泰來否往斷之在我展也有成維去義懷利之誠嘗略聞於孟
子若異域歸志之傳實備見於唐朝幽谷喬木較然其迥殊渾酪重
裘釋爾之可厭徒父子君臣之境服仁義禮樂之風顧不遑歎端可
尙已矧國家闡聖神之教且政化極撫摩之恩奄六幕以無偏殆三
王之莫過若甘雨慶雲之覆露惟和風麗日之披臨於今寢昌振古
弗及決用從違之論一明取捨之端釋此不歸悔將焉及威明山人
推俊傑天稟忠純夙懷向慕之衷蚤啟依投之緒葵傾萬國之表穎
拔四夷之中洎從行慷慨之徒悉自蘊勤拳之想書之縑冊而何愧
確乎衣冠之是存信使下馳誠言俯逮盡出由中之請有孚不肖之
心感詠實多哉藏敢後竟力踐大丈夫之舉諒無縈兒女子之情朝
發穹廬夕覘內境金犀蕃錫當立至於听廷爵祿醲恩亦交來於帝
所永作中華之胄首詣信史之書罄此有生樂焉上國彭濮巴渝之

助猶在下風春秋冬夏之行長瞻赫日某敢不親提師旅深入疆陲
會面有期預喜一斑之覩承顏不日尙遲踰刻之間努力何言竭心
以俟

北路都招討曉諭劉繼元檄

年月朔日北路都招討告劉繼元曰蓋聞德博威制者廣是名王者
之師兵行使在其間要亦古人之義維帝烈皇猷之廣被尙書文車
軌之未同忍遽致於大刑用先施於文告蚤回念慮毋俾吝尤國家
極效漸摩紹休開勅訖惟人面畢知職貢之修瞻彼河眉乃緩氛埃
之屏還觀五閩並裂四方有古冀都屬茲劉氏顧周室甲兵之問洎
先朝旗鼓之鋒養晦有年推亡不日載念山川之割據旣賒日月之
變更臣子亂常儻非自我天地同量以至於今久矣戴盆每焉藏疾
仰歎實沈之次俯矜恆岳之方尙阻四巡合歸一統矧深仁之及物
寧終怒於小夫式觀江嶺之降王有耀吳關之納土同躋一視卓冠
百王惟是非利害之端在頃刻毫釐之際勢之必至理有固然大明

當天寧容燭火之不息黑子著面誰謂鴻毛之匪輕亟反首以三思
毋噬臍於七縱社稷血食徒爾自文幕燕巢居曾謂固藉何足爲狡
兔之三窟不當念首狐之一邱隗囂實愧於竇融彭寵何如於耿況
當識君臣之大義勿貽今古之深羞其或愚固怙終執迷忘反僥倖
不可數得禍福況乎甚明雖聖王推惻隱之心奈師旅厲虔劉之志
誠言不再後悔何追

序

禮選序

禮選者諸王府侍講邢昺所上也惟昺通儒碩學究心禮文之事慨
念先王制作其詳不見於世戴聖遺傳粗紀孔門之道學者聚訟尙
應討論之功是用筆削以成一家迺雍熙四年八月晉諸斧依凡二
十有一卷聖主嗟焉孫謀貽後見於曝書之日召昺同觀帝藻下飾
爲一世榮美貳之縑賜昺家訖藏諸冢其不朽也已易以卜筮全詩
以諷誦全書百篇蓋存者半然帝王大綱猶可想見惟是禮樂之事

諸儒孜孜補拾不過推士禮以想像萬一西京之末大小戴興焉而德所傳未能粹然大禹之黻冕仲尼之俎豆空谷足音是將焉屬月令明堂位一二附合是殆可略也曷也皓首窮經紬繹之勞殆非常人此緝以爲書則上而天子諸侯之所依憑大而郊社宗廟之所設張下而至於三百三千皆可以無媿用以垂世至於千萬年而不已眞韙事也東都曹褒因叔孫通之書次序禮事百五十篇李唐魏徵作類禮二十卷元行沖又從而疏焉若可比肩是書然褒之所祖不純徵之任己自專豈若曷合諸儒之長以釋不刊之典哉是宜眞宗皇帝好善忘勢加之贊述五色下被而萬物增華也曷是書世未之見史略其說然獨知其爲戴記者蓋曷獻書之辰太宗皇帝取其一篇加之聖覽史謂文王世子則爲戴聖之書明矣曷之書其目則曰分門禮選蓋彪臚有條各從其類之文也所上止二十卷一書以爲二十一卷豈一卷之目合其數乃若是耶是蓋曷書之細愚獨取其千載之不忘孔門之講習游夏之淵源以淑諸來世茲實爲醇

儒矣

梁文選序

文選者昭明太子統所集也維統心明才通好古不倦凡百縑冊既輯既繹載念辭華之作由屈騷而下浩若烟海雜然並陳遴擇之功弗加則黑白甘苦混爾一區孰取孰舍雖皓首窮年曷克殫究後學來者何所矜式是用極耳目之廣徇權衡之公拔其尤殊成一編之書凡三十卷詔諸不朽不可無述也二氣網緼太和保合靈而人秀而文經綸乎事業發揮乎天人崇庠間陳醇駁互見未易一概言也績學種文之士儻將淹今古而觀之則必有去取焉有褒貶焉有明而無厚也有決而非同也海納川涵蓋所未暇而採摛孔翠拔擢犀象吾亦於其善者而已矣由屈平以來更秦越漢分裂之邦離合之統上下數百載代不乏人發於情性見之事緒揭爲世用形諸筆舌者不知其幾也若大若小或淺或深博若摯虞不過爲之流別而已他求暇也帝子之英精懋墳典博望名苑聚書幾三萬卷一時俊乂

之流網羅無遺朝慮夕講孜孜不忘聚古作而耕獵焉討論之力既加蒼萃之功益著月異而歲不同以成章告曰賦曰詩曰騷曰七吟詠情性之作四焉曰詔冊曰令曰教曰文上之訓下四焉曰表曰上書曰敕曰彈事曰牋曰奏記下之事上六焉曰書曰移曰檄曰對問曰設論敵以下一往一來者四焉曰辭以陳意曰序以述事曰頌曰贊曰符命以稱美曰史論曰史述曰贊以評議古昔曰論以析理精微曰連珠以駢儷對偶曰箴曰銘以自儆曰誄曰哀曰碑文曰墓誌曰行狀曰弔文曰祭文以厚終始於班孟堅兩都賦終於王僧達祭顏光祿文凡三十有七種而賦詩之體不與焉由梁而上異篇名什往往而在統之志勤矣艷高屈宋香濃班馬而今而後吾知所從事矣音則蕭該僧道淹公孫羅許淹曹憲注則李善公孫羅呂延濟劉良張銑呂向李周翰其訓義日以宣明孟利正卜長福之續文選卜隱之擬文選瞠若乎其學步矣徐堅文府選云乎哉韓愈以文鳴而高奇杜甫實詩人之雄也其訓子乃曰熟精文選理則統也其可問

諸選也其可忽諸

神農時令序

神農時令序者因穗書而有作也惟神農運膺火德至治純麗昭格
休應上黨之山嘉禾八穗知者勅物粲然成文上觀天時爰班明制
以前民用丕休哉出治之丕彝三皇之鉅典也三墳久亡間見於韋
續字源庸撫初末爲之言曰日月之行星辰之運斗杓辨指昏中定
次各有其常不可變易天之開人固如此作訛成易使不失其度生
殺予奪使不違厥宜微而車服飲食近而出入起居罔不俾適厥性
人之事天者其可忽諸風雨霜露無非至教保合太和必由鉅聖則
時令之書詎容無作維犧皇氏首造書契河圖効靈八卦三畫二十
有四默象厥氣欽若敬授未極坦明逮於神農運化日開蕡桴葦籥
聲樂旣闡男耕女織民生不難凡物理之未發者咸將顯著天道聿
啟聖心感焉迺因穗書庸班時令想夫皇謀旣定羣臣叶從迺探迺
索發揚隱奧克開厥後貽之萬世日行終始八節爰創大火而下五

官並建各揚厥職歲終索響大蜡伊作凡爾百度咸用厥時逮觀大
易十三卦之義聚貨懋易迺在日中豈市道必於陽盛之時而後可
也觸類以長事爲之制物爲之防又可概見矣維耒耜之興肇於斯
時神農見號厥尙可探斯因禾瑞爰班茲令意者令所著獨於耕植
收斂之際尤詳厥理耶且帝復能相土地之宜燥溼肥磽高下之別
令民知所避就見於淮南子之書仰觀俯察遺諸永久兩全而無闕
自非聖人疇能若是耶淮南之書又曰以時嘗穀祀於明堂觀諸後
世四堂十二室之制侑薦嘗新之法見於呂令之書者殆皆神農之
遺耶厥後黃帝當時明天五雲分治朱宣玄鳥而下分至啟閉罔不
釐職陶唐欽天羲和仲叔之掌冠於經端周公時訓月令之目見於
汲冢之書非神農舉之於先疇能述之於後耶周官籥章一職專掌
春秋逆寒暑之氣俱擊土鼓夫土鼓者神農之所創也作者之意殆
欲後之明天時者謹毋忘神農之功云謹序

宣和殿博古圖序

有宋八葉天子聰明冠倫密庸萬化之表坐襲垂衣之慶海縣鏡清
幾務餘閒稽經誨儒之隙每以好古博雅爲心謂思其人當愛其器
雖旣更億變多歷年所毋庸畢見然範鎔不朽之質諒有存者旁搜
遠獵孜孜不倦鼎來萃聚采入采切天畀地子積日累月旣溢乎玉
府之藏爛乎秘宇之列帝心悅焉思以警動羣目發揚若稽是用肖
其體則備厥款識施諸繪事勒爲成書以烜耀於億萬年皇乎哉曠
世之盛典也敢鋪張帝旨冠諸篇首曰高卑旣陳書契肇開中古而
降文爲日詳明聖制作物有其則凡厥器用至理所寓毋曰粗末不
足控揣舍是而觀義之精微或幾乎息逮乎兩都世降道夷然去古
未遠猶有存焉辟之禮失尙求諸野空谷足音蹙然而喜兌戈和弓
垂之竹矢周序炳列和鐘離磬女媧笙簧寵錫於魯古之聖賢嘉尙
若是漢獲故鼎殆非九牧貢金所成薦之郊廟間見歆豔特書大書
匪一而足豈徒觀美而已哉文獻不足莫甚樂律黃鐘夷則姑洗之
虞猶足攷其一二況他乎維我熙朝開創之初五緯叶於奎文明之

通有開必先區宇既平篤於典藝旁逮史籍列聖就將謨訓洋洋振
古未覓昌期盛際仁義四達旁皇洋溢咸五登三罔有軼言維是往
古禮樂之具下逮日用未克哀萃鎔范有度銘鏤有義可安可稽未
遂紬繹當是時也聲名四洽年穀屢登爰詔多方乃咨乃訪輻輳屬
至爲品五十有九爲數五百二十有七曾宇禁嚴肆陳彪列參錯典
藝玩想不已書之簡冊昔人興造之旨罔不咸在誠酌古大端升平
格典也隆勳景鐘相踵有作大享殷薦視昔罔愧無自而然哉中興
以來是書秘在冊府小臣竊窺萬一蓋爲卷三十敘論之略先禮後
樂曰典制曰征伐曰常用曰燕閒抑居其次云臣謹序

禹瑞曆序

瑞曆者神禹欽天之書也維禹隆功厚德克膺明顧曆數在躬允繼
極治端拱無爲百度自彰仰瞻垂象運動有則垂世立法爰紀厥常
經緯具舉疾徐無爽列之簡牘以示千億欽崇不朽用承天休名書
示意實曰瑞曆其事不具於夏書而荀卿天論獨著其略敢追哀梗

概爲之言曰兩儀並立天職洪覆日月星辰罔非至教神聖體之爰
建矩則仰察敬奉恪恭不懈用以顧諟明命斂福錫民由來上已周
天曆度始自泰帝推分星次黃序明民創受河圖重黎有注少昊名
官首日曆正式序三辰越在帝嚳下逮陶唐德冠百王羲和曆象殆
半堯典欽若敬授誠弗可已舜之曆試首齊七政重華協帝克紹泰
和雖去古旣遠書不盡見然其觀象作則前後一軌矧維大禹親承
治緒襲爵行道烜煥一時欽天之書其可無作遠括羲黃近祖陶姚
紬繹鳩合克臻大備財化輔宜庸以無闕二典三謨與爲表裏想夫
是曆所述兩曜聚散五緯疾徐如指諸掌經星常宿維見可觀以占
則信以攷則明天儀合焉羲和職焉用以垂諸永久誠大君盛節治
世寶書也洛書千載之期上媿皇策之盛光昇彝倫九疇肆敘箕子
傳之數百年之餘武王下車汲汲訪問洪範一編光照簡冊五紀曆
數實居其間然則是書之作蓋本諸天智若行水毋意毋我曰瑞曰
曆厥有深旨範其領會而是書其詳者歟矧禹克勤於邦櫛風沐雨

溝壑之地殖爲桑麻魚鼈之民育爲衣冠後人稱九州之廣必曰禹迹蓋功大則萬世不忘禹之俯察於地既勤若此則仰觀於天見於是曆者要必碩大光明有條不紊與禹貢一書相爲上下地平天成萬世永賴歸功有自要當不誣孔子答爲邦之問首取夏時殆亦出於是曆記禮者敘夫子之言杞不足徵吾得夏時釋者以爲夏小正果聖人意哉禹之行已儉於欲勤於德略於私厚於公菲食而致孝惡服而美冕其奉若天道者殆詳且悉也後世義和廢職至勤嗣侯之干戈足以見典刑之存稽諸漢志七略之目天文一家禹書不少見獨有夏曆冠殷周魯之先今書不存無能識其梗概云

帝學序

帝學一書乃元祐五年侍講范祖禹所上也維祖禹純儒碩學究心致主之術謂夫尊臨六幕統理萬幾自非講習古初不忘龜鑑盍臻盡善之域是用稽參前牒萃合往行上繇畫易之日近底元豐之年凡宸心緝熙經幄紬繹之故悉歸會輯爲書八卷寘之淵辰用宏端

緒日新益明之理舍是殆無他歧厥旨深矣有天資有人力天資至矣而人力或有愧焉必歉然於中要使人力足以濟其天資則乾坤無不全之功神聖有蔑加之德今夫一介之士不敢自棄自怠必思夫修省之方琢磨之術以無赧乎降衷之善受中之粹矧夫居四海之上爲萬乘之尊予奪自我維持自我舉一政可以厚八紘修一德可以倡萬姓其可釋師古之道去正心之理以一聽之天哉此帝學之書不可不作也上考古昔由伏羲以來書契以降孰不以學爲先務堯舜禹相踵而作語其德一曰稽古二曰稽古形之典謨垂爲軌範皆學力也文武並興百年一轍播之雅頌亦學力也從漢而降猶是物爾惟我本朝累聖相承崇儒尊經超軼近古盛治所就奚止四三王而六五帝哉惟我哲宗皇帝接千歲之統膺鼎來之年自修切磨之道舍學將安取哉祖禹獲侍經帷夙夕孜孜謂無以開萬里之塗則燕轍越旆莫知所適一木之本不正則他日之厚薄纖宏殆未可知也職在太史縑冊之存可稽也責在進德古昔之善可舉也吾

非侵官而離局也吾非強聒以自誇也事當其宜而言有其要也且一言可也而至於八卷之博祖禹之心切矣說命有篇敬之有什商宗周后用以立德用以保治脉祖禹之書一轍也祖禹蓋嘗輯仁皇之懿法以爲訓典一書又嘗預司馬光通鑑之編二者足以明烈祖監媿惡有補一時有補來者蓋不止帝學一書而已然而帝學獨能開端倪澄其源正其本使不哆不異後世之君苟知所以尊用崇信以兢兢業業日昃夜分以深察吾心博觀物理參之前言往行淑夫一身淑夫天下後世其用可勝殫哉其盛可容言哉夫沫泗相與漸摩不一而足魯語一書成於門弟子獨以學習冠篇蓋聖門正傳必自是始祖禹其有以脗合也夫

太平廣記序

臣仰惟太宗皇帝嗣興勗之運混文軌之宇治叶登成業懋稽古爰詔儒紳采獲昔人稗官之篇條分臚析爛然有第凡五百卷藏之秘館制作之道宏矣學尙乎博聞貴乎該不讀山海經畢鸞何以辨不

熟爾雅幾爲勸學誤一陋一洽得失較若書可無作乎自典藝粲然
易之幽書之明詩之雍春秋之肅學之道訖已歷年牒猶曰治亂之
別成敗之殊釋是括九流下騷問尙遠而不卽廢而不攻況百家之
細乎致遠恐泥明戒凜凜維日不足我則未暇儒者類以未爲諱以
不正爲譏博極羣書旁通百工之學卒蔽大人之賦已事前轍可不
鑒哉曰是一曲之說非達觀之見也蓋自乾元四部以來唐政不支
醜羯腥聞播於太紫之上大京眾師金湯屢隳牙籤散亂之簡不越
而之四方則莽在泥塗國史不克全況他乎重以末造之禍極之五
閩之變芸香半落竹帛土苴誰復念之干戈鋒鏑之餘天厭塗炭眞
人挺生鋒旗四焱罔不臣妾孟蜀江左之掃除舟車聿來册府以充
雖投戈疇隙絕亡馬上治天下之想煜煜奎躔下闕圖書萃於五緯
搜遺有詔獻書有賞表著方册炳炳若丹以舜嗣堯重華有光三館
暈飛崇文標記中屹傑閣雲章昭回頓還石渠東觀之舊文風日起
御覽一編千門萬戶包總細微咸曰周敘英華踵作囊括後先流別

井然若延萬士裁冠切論皆前所未見猶嘆聖心蓋曰洪造無垠變動惚恍殊異之象時出間見使無以昭明之則駭溢元元將有禹鼎未鑄之患彼芻蕘一言日表晏溫不以爲鄙而慢之也况宇宙之宏編帙之繁耳目所不接忽而陋之不幾以常而廢變守一而忘百乎五石之隕恆星之如雨格諸降莘言晉之故左氏不爲誣矣故自虞初以降千端億緒或是或否若信若詭有不暇論也若大宛之馬驪黃牝牡雜然具存不爲汗血之豢也若大秦之珍瑟瑟渠珊然並舉不惟尺璧之取也大矣夫有六經爲之正有廣記爲之變括洪荒而無外秉仁義而不惑吾道之終乎極千古之醇武成惟二三策竟萬物之動九鼎用知神姦來者克明則皇心萬一愚言不爲誣矣臣謹序

靈巖集卷四

續金華叢書

宋唐士恥撰

記

剛應廣利忠祐侯廟記

婺之列壤上直須女垂芒俯屬大者峙而爲鎮望其南則派自鼎湖五雲郁紛黃帝所盼睽北則脈分東越叱石羊興初平所隱遁焉南迥而秀短小精悍如賓從却立惕爾聽命北乃挺傑偉有堂堂大丈夫峩冠列坐之態意其必有異人起乎其間其生也不凡其死也不泯捍患禦災芘民澤眾猶有見于百載之下可以尸而祝之社而稷之血食永禩名在頌臺之典者是殆山川之所自有而亦豈尋常之故也耶邢爲縣鉅姓間亦儒冠自修撫仕吹鐃然未見名聞一世表表在人耳目者靈氣磅礴乃在於神耶且神之在母也有金革之兆及其既生也無齷齪之見弗屑章句儒所學萬人敵蓋嘗觀光上國有意鶡冠雖命不時偶於邑以終猶能息山房之厲以芘里民佐旗

鼓之鋒以靜祆禩以至除疾疫之害眾却飛蝗之戕稼曰暘而暘曰
雨而雨無感不應又爲一邦之顯相豈其長存不朽真足與世之建
功立事者並驅爭先也耶是宜里人思其烈公朝著之名睟容一新
堂序鼎立永垂來禩至於千萬年而不已也耶嗚呼與其見用於一
時孰若留芳於萬世與其鼎食於生前孰若尸祝於身後使神遭遇
時君一將却敵功不難建又豈若今日之事之爲烈哉夫人死而有
知者其死也必有異焉方神之氣索魄褫不隳不仆筋維骨支儼若
生存之日則知其所得於天也厚矣所異於眾也遠矣是又烏可終
泯也哉神世居金華之赤松鄉諱植賜額之班蓋嘉定三載九月二
日公朝書贊旣已勒在堅珉茲不詳述姑爲樂章以妥靈侑饗辭曰
赤松兮白石兩仙兮孰識山所鍾兮未已有神兮民是翼彼大弓兮
長矢若秦王之崛起神俯視兮振槁力有餘兮莫比是天之所付兮
非常胡忍齷齪兮堂堂六塵兮曾足道豈屑意兮公王一時兮孰若
萬世芘民兮驅其厲斬郅支兮封狼胥是吾之心兮轟雷車昭昭朕

嚮兮氛祲掃名登史牒兮幾大道

漢追封高祖功臣記

漢高皇帝以睿明之姿廣攬英豪蹙彊仆暴大難略平則旣並啟爵
邑俾傳孫子與國咸永惠文高后繼之數十年之間搜遺追封尤切
不忘其事見於史記惠景間侯表之敘一代盛典不可以無述也天
啟眞主風雲草昧必有智勇之士爲時而出大業甫定分茅析圭開
國承家永錫曾仍貽苾無極旣盡報功之義然其後世之君猶且日
篤不忘每惟搜討講求是急必欲使尺寸之效舉無不見知之歎其
爲孝也大矣其厲世也切矣肆惟高帝有知人之明極容才之量下
逮屠販寸長畢錄用以組嬰梟羽脫斯民於鬻炭區宇旣平歌頌以
發清廟之策旣不敢緩爰自六年十二月甲申始裂平陽以畀曹參
迄十二年六月曲侯張平之封凡百五十有三人厚以第室之賜固
以山河之勢表以十八侯之位次漢承秦舊爵列二十通侯爲冠由
關內侯以降下至于公士霑等級之恩者尙多有之特詔肆班申勅

長吏厚遇高爵入蜀漢定三秦之士恩復世世酬功懋賞斯亦足矣
一傳而孝惠再傳而高后三傳而孝文皆克紹厥世將相公卿登用
耆舊列侯朝次藏之宗廟猶以爲未足又取高帝未論之功俾祚爵
土父子之仁君臣之義交至曲盡猗歟盛哉謹案本表平都侯劉到
以孝惠五年六月乙亥封平定侯齊受以高后元年四月乙酉封中
邑侯朱進樂平侯衛無擇山都侯王恬啟祝茲侯徐厲醴陵侯越則
四年四月丙申所封南宮侯張賓俞侯呂它又以父功追封樊侯
蔡兼以文帝元年六月丙寅封蒙之克家蠱之幹父特書屢書孰謂
漢家之猶少恩哉厥後孝宣元康特發廟藏復家賜金百三十有六
人孝成孝哀興滅繼絕建初永元復封元勳之裔桓帝咸熙三年猶
錄蕭曹之後前後一轍有隆不替宜其盛哉終漢之世鼎彝太常之
勳不一書而止豈勸率之道素茂有以啟之耶

唐貞觀凌煙閣功臣記

唐太宗文皇帝以濟安之姿承開叛之運文綏武服萬方同軌爰命

治功之成雖曰圖維自我一人而叶濟左右抑羣臣是賴纂承之始
首定封戶帝心若慊以爲未足載維繪事省貌表揭會字用彰殊烈
永垂不朽誠弗可緩越貞觀建號之十有七年二月二十八日戊申
誕發明詔圖功臣於凌煙閣真帝王盛節也明主報功之義期詔罔
極拔尤取穎審象垂名與日咸新以勸以厲盛世一轍漢宣冲興麒
麟畫象光武系隆雲臺襲美兩都四百帝業用昌矧維太宗聰明剛
決叶贊神堯果密德充以次翦滅中區旣寧靈旗四指突厥高昌相
繼俘蕩冠帶詩書配天軼海紀綱制度鼎鼎近古俗易刑措庶幾泰
和固已高軼七制而上追三王矣勗業守文策力咸備偉績殊勳掀
揭一時烏可循默無報爰命丹青具紀形貌致之禁嚴日庸臨觀想
其冠紳劔佩鱗次櫛比立朝之正色在師之嚴貌暨暨濟濟鷹揚山
立雖千百載之下儼然在目風行化洽人思勉旃追思魏徵登觀賦
詩委重李勣別圖自序始終著名遣使特祭開元潤色曹霸承恩瞻
望崇締感想雲龍茂恩隆渥有加弗替佐命勳勞益用不泯太宗親

讚一卷見於藝文志別集之目劉氏舊史載玄齡之贊曰當官勵節
奉上忘身豈卽太宗之文耶王氏注杜甫丹青引復曰親序豈序贊
並見一時耶唐曆唐統記悉謂世南出自特寵意者博雅領袖獲與
是列耶呂溫贊引以爲象二十四氣若漢將上應列宿者果當時之
意耶舊史又載孔穎達明年圖形豈其後復有繼登者耶考之六曲
凌煙在宮城之內李庚賦西都謂締閣圖形榮號凌煙則斯宇規建
殆亦我朝博雅之士總錄金石考之孝恭志元兩碑曰圖形戢武豈
揭名前後不同耶厥後聖曆侍臣加之贊述子儀光弼下逮希逸肩
摩登茲貞元寵詔刻石勳門遂良等二十七人見於會要晟等三十
六人上親爲贊見於李翱所述柏良器之碑大中二年七月己巳續
所未圖前遺後承光明靈長亶其盛哉無忌太宗實錄柳芳唐曆陳
嶽統紀皆二十四人始於無忌終於秦瓊具列名位會要無靖士廉
然亦曰二十四人矣秦瓊傳雖無士廉末敘永徽所祭迺居第二呂
溫曆贊二十二二人而亮君集以罪斥吳兢貞觀政要與夫閻立本所

圖數皆與實錄合然二十四人當已謹記

漢永平車服制度記

漢顯宗孝明皇帝以聰哲之姿膺重熙之運三雍七郊禮明樂備上
嬪隆古人知向化惟是中興以來撫摩勞來歷有年所民殷物阜中
人易移未免小侈車服之用稍踰法度帝思財約爰詔有司申討參
酌建爲矩則以壹民心以防濫溢不休赫哉真人道之不彛帝王之
盛節也其端略見於本紀永平十二年之詔而輿服志注復引蔡邕
敢哀集梗略爲之言曰人心惟危因物有遷不知自節殫肆無度明
主憂之爰規定矩俾就準繩不僭不濫五三尙矣漢興以來高帝草
創衣服操乘僅抑賈人班壹雄邊至僭旌旗秦俗未除屋壁倡優帝
服后飾識者憂焉深用太息太宗刺經制服名篇槩在七錄謙遜未
皇意則難見專事躬率締衣草舄上法堯儉祈易風俗孝景植詔唯
及長吏世宗初政縮臧首議逮夫天漢深厭侈放大索京師四年甘
泉乃班明制旁達出日見於南齊輿服志大國朱輪特虎在前左兕

右麋小國前熊寢麋左右又具於劉昭所引古今注之文概見一目
他宜稱是先漢制度森嚴若是不可尙已東都以來務用安靜未及
裁制顯宗紹遠粟斛罕作貢賦尤輕府廩還積草木殷阜牛羊彌望
戚里侯家車如流水馬如游龍極於齊民頗恣耳目帝則憂之乃命
有司乃究乃討上自侯王下及黔庶被服嫁娶各有科品廣示四表
永貽萬嗣皇乎卓哉誠有國丕則人心大防也帝意若慊兼用躬行
身御澣衣誠意深切刑妻齊家椒房春宮重繪厚練用倡於上匪恃
政刑有光文祖德禮具修一時抽毫之士並賦兩都謂申舊章下明
詔命有司班憲度昭節儉示太素去後宮之麗飾損乘輿之服御文
核事實殊非濫矣重規疊矩有隆不替肅宗建初二年二月辛丑明
詔申勅兼命齊相省去三服休素方空穀吹綸絮馬廖抗疏將順長
樂廣平鉅鹿樂成諸藩樸素蒙賞孝和永元十有一年七月辛卯復
揚明憲諸古麗圭穆閨緣加上奇裘之飾影滅迹絕孝安之元初孝
桓之永興悉修故事前遺後述化行俗易猗歟盛哉然而明堂郊丘

舊儀非古帝命諸儒東平宗老尋繹藝傳冠冕車服悉還聖作烜赫
明備似非所以示儉然識者深挹帝旨殆大禹惡衣美冕之心並行
弗悖理固若是帝承尊經之緒夙造時敏是宜舉措悉惟厥中有唐
車輿衣服著令武德殆亦永平之意本紀詔在十二年蔡邕以爲永
平之初范志湮滅弗可詳考姑存厥異以俟博雅君子云謹記

紹興新建太一宮記

有宋中興再造之天子以睿明之姿紹復炎景區宇略平百度次興
布衣臣千秋言祖宗故事咸建太一之祠永祈年穀之登今茲翠華
所蒞未有常所迺詔頌臺尋繹往典宣和舊宇蓋在乾維爰究爰度
鳩工聚材考成于紹興十八年季春之月凡一百七十四區輪奐肇
新恪恭典祀貽芘千億不可無述也傳美少康復禹之績必曰祀夏
配天不失舊物漢宣中興金馬碧雞之祠迺致一時之譏蓋禮有不
備丕承所急汰侈之心非曰孫謀若昔興王虔鞏玉帛用恤明祀凡
以申薦德馨貽福元元旣非一己之私則繼世之君修振墜典胡可

緩哉太一之祠雖不經見楚人九歌吉日良辰形之詠歎彪炳可覆
漢武甘泉昉乎繆忌唐之乾元王璵有言弗雅弗專無足譏已聖祖
神宗宏模典要丕不易遵非漢唐比太平興國六年首建會宇一新
祲威殖寓陽郊天聖八年兆乎西熙寧六年處乎中宣和元年又位
乎北凡以奉若天道泛應曲當中興之君其可忘乎哉矧建炎以來
明謨糾斷偃伯靈臺奠安六幕百司庶府駸駸略備旣彷彿象承平之
舊惟五福之祠以格有年以芘億兆者猶有關焉韋布幹議明旨繼
班奉常獻儀共工董事乃勅乃戒民不知役蓋易年而後成翬飛翼
布弗陋弗奢璇題奎畫日崇真日靈休日瓊章寶室日介福崇禧炳
煥之時齊明有殿眞儀有庫修庶角立采繪彪列籩豆靜嘉悉著悉
備自今以始四立之辰祈穀之月恪修薦饗罔敢遺失下逮黎庶乞
靈有度二十有一日帝乃躬修西面之禮陰雲四開庸昭肸蠁凡爾
在列載欣載肅罔有軼儀熙朝之盛容復古之大端弗可加已夫會
宮壯麗釐事肅雍迎康年厚生民仁也俾率先王不易乾方似古人

順天命義也五典祭爲上百神太一爲貴懷柔胙飾禮也一舉而三善從焉不眩不畫智也大報汜成必躬謁乎是館堯舜禹湯繼繼承承凡今幾見而永錫鼎來如川方至是宮之建豈曰小補哉臣謹記

天臨殿記

若昔眞宗章聖皇帝治叶休明萬祥畢臻東封西祀告厥成功爰幸亳社躬謁太清之宇萬騎雷動次於近郊臨宿雍邱之梵刹紹聖初知縣事臣黻詢逮緇流采獲異聞顧瞻太息改責儀範俾埒皇居爰揭巨扁實曰天臨欽贊樂石歸忠之意輝煥一時不可無述也天子以四海爲家玉鬯羽騎無遠弗屆翠華黃屋驚夸際幸後世之侈心乎虞周時巡徧逮於方岳蓋曰秩典非見創聞欣喜色見羽旄之美特當時之頃未聞若來之表著以侈於永世何也夫臣之事君蓋主乎敬若稽往蹟華蓋承辰星陳天行風伯雨師汎灑交馳嘗及乎斯地警角告嚴玉漏司晨夔龍悲壯之音若由在耳鹵簿森拱入門無譁旌旗軍馬之容若然在目於是而忉然曰一時之偶也不幾於

不敬乎漢世巡幸之地皆使致廟祀焉於古雖未前聞要亦君臣之
義未造由不敢廢豈一時之陋哉康衢之謠曰帝何力於我華封之
祝曰願聖人壽在堯雖無適莫而事君之義則有間矣矧惟真宗承
千歲之統廣三葉之仁偃載威械與民休息皇乾顧歆度越圖書之
表升中展慶上比七十二君之盛汾陰瘞祀儀矩叶成今茲欲謁真
館千乘方軌方是時也耕食鑿飲無供辦之勞黃童白叟有縱觀之
喜春風和氣四溢衢術雲仍相傳以爲大幸故雖七八十載而未能
忘也黻於是竊有聞焉皇澤四宣家佩典藝天保報上之心夫人能
言黻也儒生負民社之寄宜其一聆盛際侈大而閱張焉以舒宿昔
向上之願而不暇請也方朝謁訖濟古毫末都咸賜酺樂麗譙壯觀
曰奉元均慶曰重熙頌慶炳煥一新君能下下以成其政於是乎見
之則黻乎其可嘿哉或曰陽曜匝宇容光無間而曰日在是天一周
流盈虛變通而曰水在是是不幾乎誣然神化運動有一有萬一者
名旣若是則萬者盍其可違而况天平標曰天臨確乎其不可拔是

名特見於王明清揮麈三錄以會要考之蓋大中祥符七年正月十
有六日縣之圍城鎮徽之初扁則歲月罔知姑存其略以俟博雅君
子云

玉宸殿記

玉宸古別寢也朝聽書問厥事既昌日倚而槐陰薄漏移而蓮炬開
絲歟竹歟皇胥樂歟息歟游歟薦清躬歟矧四夷賓服萬樞澄簡日
宴而坐幽枉必達問之朝羣賢濟濟鏘鏘問之野黔首熙熙皞皞河
圖洛書不藉龜龍之出東封西祀並驅隆古之際非有暇之年歟崇
文有院龍圖有閣太清有樓四部七錄取之左右逢其原廣廈細旃
幾冠切論爭先勛華肆筆爲經萬世五色表裏典藝講非不詳指非
不洽而皇心莫之嗛也三朝九陛負宸凝旒大寢叶焉惠極承宸居
非不足也翬飛鼎新旣勤樸斲匪軼匪私毋意毋我九重靜淵萬籟
不作綈几獨御歷歷維見優柔厭飫深造自得悠然會心時一解頤
韋編三絕不足喻其懋夜分乃寢不足喻其力也宏我漢京兼麗卿

雲有曰金華玉堂白虎麒麟區宇若茲不可殫論內也不過曰乘茵
步輦唯所息宴而已非古訓是力也武宣之侈心略而弗論可也然
而身衣大練之后弗與濯龍之私倉卒足欲外戚傳至與藩王爲密
宦官女子幾得其隙也殆矣夫俗成治熙文治煇興外若可觀自今
考之直文具爾太紫在上丙丙有度奎壁邈焉周官外史掌三皇五
帝之書天有所不及聖有所未至而我章聖皇帝獨全秉德百王一
人千載一日也而況茲殿所藏凡八千卷雖九流古義有所弗取況
稗官乎帝之學也非苟爲是博也仰續道統文不在茲乎且帝之若
稽出自天性非矯飾所至故凡命召臣工樂豈之頃必先之藝文其
見於玉宸也四爲景德四年三月乙巳由太清而至是殿也大中祥
符七年三月十日觀太宗皇帝聖文神翰而錫之膏飫也八年四月
癸丑朔則先是字而移御也九年三月四日蓋獨召宗室焉他日又
至則天禧二年十月十一日四年十月二十九日兩觀稼焉以考古
爲未足又察乎稽事人勤怠心何自入哉且是殿所陳有若漢文書

囊集惟方以道德爲麗外物烏足道哉帝藻昭垂嘗紀本末臣懼其
慊也用極鋪陳云

仁濟殿記

宋興百有餘載德茂存乎四世湛恩汪濊洋溢乎方外凡可以利用
厚生爲億兆計者靡不畢舉迺慶曆紀元之明年二月庚辰爰班明
制以大相國寺鍼灸圖石壁堂易名爲殿標以仁濟緣文察實聖意
彪炳天地覆載之德陰陽化育之功有弗自全而我仁宗皇帝將實
全之不休哉帝王之盛節也神聖以天下爲己任一夫之不獲一毫
之未至吾心猶將惡焉故其發政施仁之際雖一工藝之微苟可爲
斯民地者咸盡其惻怛斂薄刑清政極豈弟風正氣平物無疵癘神
聖之職殫矣彼疾痛疴癢生於小己不能自衛雖略焉可也然由已
飢渴之念初無彼此之間博施濟眾與天同大自昔黃序題期岐叟
應明堂之詢纖髮悉備神知創始正物明民見祀億千弗可尙已周
官醫師而下庀職爲詳疾瘍者造歲終稽事蒼籙忠厚百代所仰漢

之西都奉常少府並建太醫初非重複東京省官乃去其一及民之意邈非前比唐之太宗覽圖明堂僅戒鞭背仰視皇王之仁負弗可及維我建隆命馬嘉志等校定神農本經聖言標端太平興國集方賜序則曰聖惠仁皇善述天聖建元之五載爰詔太醫詳理諸經岐黃之秘奧越人之綱條下逮巢源罔不鼎新又念經絡十二俞穴之所差之秒忽死生分焉俗傳訛謬弗克明壹復命尙醫奉御王惟一精加考訂爲書三卷模木班用命翰林學士夏竦序其意鑄金象形備列纖悉置之一日二日之地以正粗工之謬今茲鍼灸有圖石壁有堂其殆推廣前日之仁由天聖以迄慶曆二十年間有加不替克臻大備休稱昭揭聖心炳焉自茲以始凡爾工藝服習究玩艾石所施必審無舛六藏以條百絡以鬯暴疹不作咎全天年其爲仁也大矣其所濟也廣矣蒼籙之盛殆不過是東都李唐比之禍已四十二年之治凡可以幸斯民者無所不用其至廟號曰仁不亦宜乎厥後徽宗皇帝政和紀號之八載五月將望聿班明詔經曰聖濟出自宸

藻備論衛生核邪之道以幸天下宸衷惻隱先後一轍猗歟盛哉宋
敏求記東京謂殿建於天聖八年在寺庭之東與寶奎殿對峙殿之
石壁蓋仁宗御篆針灸明堂經之文姑載其略以補國史之闕云臣
謹記

漢議民徙寬大地記

漢孝景皇帝以德克肖接千歲之統始初清明慨念稽事之艱顧維
井田之制旣一變於阡陌漢室龍興專意休息未遑復古肥磽廣狹
憫然隱卹簡在宸衷迺元年正月肆帝班綽念人士之不相適爰勅
有司稽眾論民有欲徙寬大地者聽之皇乎哉明時之善政人主之
盛節也不土不生土不人不成游民間田隆古所無咎單明居植
成一編豈亦成夏之衰事資振舉蒼姬六典司空蓋其一度地居民
職掌攸專土地不易以及中下截然隆殺仁之至義之盡也秦用商
鞅壞振古之良法以自成其私干戈塗炭之餘日不暇給高帝五年
後九月徙諸侯於關中九年十一月徙齊楚大族五姓關中與立田

宅是直強幹弱支非出於厚下也孝文刺六經以作王制制農田百畝兼明司空執度之典地邑民居必參相得將汲汲於厚生本制之篇先乎兵服劉向七錄彪炳可考凜乎復古之志卒之謂皇雖務在養民田租盡除念農之詔丁寧反復而皇澤迄未究也瘠鄉鼠居食猶不濟豐薦之士人不得徙誠一時深病帝也承恭儉之德繼惠養之志在位凝命甫焉莅九重之內奧窳之間俯思民業怒如調飢帝王井牧之法雖未皇及盍求所以舒目前之急效均一之梗略爰詔有司爰開廣夏爰咨爰度首量國用興叛僅焉固未能助民之徒若夫民之有不便願自徙者其思爲之條畫以便利之凡我在廷縻夫爵食夫祿其推我公心達吾善慮以厚夫元元共躋仁壽之域想夫薦紳將將發言盈前知者啟其謀勇者替乎決順民之欲適事之中小抑強秦之偏漸窺隆古之平中正溢於簡策謳歌發於田里亦足以亞七制追盛時之彷彿矣後之純儒若仲舒蓋嘗仰思古道發限民名田之論孝武汨於兵孝宣枯於法而不暇及也田畝奴婢之禁

乃見於孝哀皇帝綏和二年之詔顧中止乎貴臣之私而卒以不行
度長絜大豈若孝景之果兩都四百之業夫豈一帝之力哉然當時
之政獨其端緒粗見於紀而他皆不詳其信史之闕文歟尙俟博雅
以要其歸矣

益州交子務記

有宋君臨萬寓天地其量不作不創因民所欲左翊右贊使訖平允
以無困蹟益州之壤鎮撫全蜀直國坤維雖車書混一初無彼此之
間然去都國幾萬里了不與中原謀壤地西接蠻戎慮其溢洩賦幣
以鐵人疾懋遷而質劑興焉主以十六戶時改事變貧富不齊有券
莫償之患起矣訟牒紛紜官疲決責或者厭之將一棄不顧然而遲
重難遷之患民又病之議論複繹事愈明白官建專務以主其事一
時因隨創建豈無善意維持可傳於後者輒補其闕而爲之記曰民
生林林不能自養饑求之食寒須之衣而農出焉神農建耕織之教
少昊立九扈之官爲聖神者亦豈能坐視其自成哉則必立之官師

著之訓飭以佐其所不逮而使之至於遂事而後已然比之飲血衣皮之時固已若多事聖人不敢憚也耕桑衣食之餘日用萬貨非一方可具理須服賈而商出焉稷佐懋遷之道周建九府之法亦無非左右齊民爲之表則使無後患然比之蠶桑稼穡之務亦稍末矣聖人不敢厭也凡其由農而有商自醇而趨便從質以歸文皆其勢之必然理之必至繼此且有變焉聖人烏所避哉我朝家法不自神聖凡百制度多因前代非喜因循樂苟簡慮其強民而弗從者藝祖肇造太宗統一眞宗守成如出一轍官師取其實掌不顧名號財用謹仍舊貫何必改作罔求富強弗務鼎新一以便吾民而已至於民有所欲起而應之曾不旋踵用能宏覆六幕仁熙義恬鐵錢重而券作主戶貧而券病薛田握六條之節極再三之思以爲吾將禁之不爲則重者不能使之輕豈公朝愛民之仁吾將任之自爲則貧者不能使之富又豈公朝理財之義折以大中則不若官爲設職制其盈虛有錢斯付之券有券必予之錢出入無毫髮之私授受無斯須之間

母子之相權名實之相召經緯之相濟力役省而紛爭息矣田請之而田去寇賊繼之而賊又去天開際幸田代賊後復起前議清朝俞音再昇外臺漕臣張若谷旣是之於其先東川憲臣又稱之於其後天聖元年十一月戊午詔音俞焉通貨泉之窮極商賈之變施之全蜀至於今賴之想其負販之夫射利之輩婦清之丹卓鄭所治重錦橦布異物崛詭四溢外區邛杖傳節於大夏蒟醬流味於番禺捆載以往垂橐而歸執券取償如探諸懷揆厥攸元薛田之力居多天聖明道之間蓋章獻明肅皇后實司聽斷其能決然用薛田之議亦仁也夫亦智也夫託六尺之孤而不負章聖皇帝者豈偶然哉或曰鐵錢行於邊西北蓋同矣俱患其重矣則交子殆亦可行也今公朝獨行於全蜀而他邊不與焉何也漢均輸亦良法也亦便民也然而君子患焉以其意不善也夫交子蜀民叛之蜀民行之蜀民有病之吾特爲之醇制而使之不躓焉非敢創其端也從民之欲也今而復行於他邊則是強民也非以便民也是以均輸之意而推之交子也其

可乎是爲記

濡須塢記

濡須塢者吳孫權之所興築也維權藉父兄之資奄有南國定都秣陵雖赤壁戰勝之威旣足以破曹操之膽而奪之然操進取之心未能遽止也一時南向之意遠溢江表權思所以禦操之術謂據江以固則逼過都邑不如進營淮甸之爲愈也乃眷乃顧因仍天險依山帶水加以人謀之臧腹心爪牙之臣蒙爰進萬年之策若曰功不可狃勝不可常古語有之先爲不可勝以待敵之可勝此備禦之至計保國之大方歟使吾有不可勝之形則寇心自懾吾眾亦堅然後遐衝可折權用其謀土功肆起不日告成卒以遏北方之侵軼偉哉斯塢其守江之上算歟其霸業之所由成歟其鼎足之勢所由定歟敢哀集信史用記其顛末在易之坎王公設險以守其國周官大司馬之屬蓋有掌固司險之官夫以王者之世仁義充塞乎兩間訖惟人面罔不來王眾心成城我戰則克而何有於險要哉然猶不敢以本

而廢夫未不敢以腹心之寧而廢夫股肱爪牙之捍禦而深畏夫人謀之未臧人力之未至也而況區區之吳哉矧操之威加四方功收百戰雖如袁本初之士廣兵盛官渡之役卒以不支其鋒殆未可忽也赤壁固非幸勝亦其自犯古人趨利之戒是能一炬而蹙之操固且暮思一洒之而將集夫新功焉南牧之舉未嘗不在心也長江混混固天所以限南北然秣陵近在水濱必思淮甸之經理以固大江之藩籬濡須之爲地當淮甸之要衝西趨合肥實北方來侮之所寄徑也有山峨峨可憑以固有水泚泚可達之江然城壘未立虞隙尚多不加之人力是烏見其可哉臣蒙覩茲端緒訖用有言關於聞聽謂諸將之言以爲上岸擊賊洗足入船是一切之見耳是常勝之家難與慮敵耳豈萬全無虞之策哉是必版築有興城雉有建使敵心自阻我意不折而後江南可高枕而臥矣權夙擅高明善屈羣策耳接斯言心契其臧可之俞之爰命攸司鳩工聚材戒役庀事迄告成焉屹如邱山當道而不可夷也堅如甲革之衛膚而不能侵也雖以

操之雄傑決不敢越之以用兵於江南躪矣夫其南國自固之大機歟且以史考之建安十八年正月操至濡須蓋四萬之眾僅能破其一將卒不能大有功焉操也方興有子之歎而懼夫春水之生十九年七月又至焉二十一年十一月復至焉二十二年正月又以二十六軍之眾至焉僅致一介之來而遂不復以爲意夫以操之威磅礴五年之間而卒無纖芥之效豈以濡須果得地利無所復用其力耶至明帝太和四年十二月之後權繼有合肥之役亦豈以濡須之旣固而後可進圖合肥耶厥後黃初三年曹仁以數萬之眾臨於濡須朱威僅以五千之眾而獨能走曹仁且收斬將擐旗之功豈以朱威之力而獨能辨此哉亦以濡須眞得領會而呂蒙之興築有以貽後耳昔馮道根之戍阜陵也有隙必塞有敝必理眾哂其爲道根獨曰怯防勇戰此之謂也而竟以却敵權也其亦道根怯防之類也歟

靈巖集卷五

續金華叢書

宋唐士恥撰

頌

芝山頌

宋興四五十載叶氣格於上下圖書之出夔超往牒人情洽熙願建
升中之禮登封訖成載修汾土之祠柴瘞昭妥昆蟲闔懌爰扣琳宇
躬修款謁凡前王盛際升平縉典罔不咸稱忱恂比馨香殊應踵出
凡仰而見之於天俯而形之於地致其物繪於圖者府無虛月史不
絕書至於自本至根效三秀之異者尤爲雜沓乃大中祥符元年六
月王欽若得之泰山蓋八千餘本六年十一月丁謂得之亳都蓋三
萬七千八百本越月丙午又獻九萬五千本焉殆前時所未有也
想其殊形詭狀五色粲發溢於觀覽不一而足彼甘泉之產函德之符
不過九莖形之詔旨詠之歌詩使見斯時之瑞豈不駭觀溢聽宜其
帝心格誠不敢隱遏叢而爲山以對天宏休二年四月二十三日命

內臣元吉分畀名地凡二百焉八年六月復錫殊庭加賚臣工各二
俸之寶藏不朽丕赫哉振代之珍符創見之明時也天瑞應誠而至
昔蓋有之求其系至麇集輻輳雲會若是芝者實千載一隆又從而
加之意不役不夷以震蕩億萬年之耳目其兩至也已是非我真宗
章聖皇帝疇克致之亦疇克顯之小臣不揆竊寓之律呂播之金石
以彰無窮之偉觀頌曰天尊地卑人焉中居有感自我厥應不虛有
義斯圖有妣斯書究而論之不差錙銖匪分而際若鼓在枹五閏易
置天厭紛如迺眷真人大濟堪輿東征西怨爰立宏模曰義以正曰
仁以濡詔爾來禩毋二者踰太宗一統悉歸版圖訖惟人面畢會我
都章聖嗣之不變不渝三朝繼承四方無虞我澤益深浹髓淪膚叶
氣薰陶方外鬼區有降自天大中祥符稽之往牒振古所無小民稽
首登封來歟言曰今日安若覆孟矧此天瑞有誠旣孚帝曰俞哉叶
以汾隅柴燎莫瘞肸蠁紆餘辜宮載臨確如前謨保合太和三秀以
敷人一已千僉用歡呼旣萬且億與常則殊於岱之域於亳之沮上

帝監觀左睽右扶不一而足或黜或朱五色交粲光彩敷腴其來雜
還厥入連車爰命爲山錫之名廬加賚臣丁非玩非娛甘泉九莖函
德之除寂寥間見何足倦渠漢德鮮矣僅爾斯須曷若昌期可張可
鋪不隱不夷永視居諸小臣作頌敢罄厥愚

紹興祚德廟酌獻彊濟公成安樂頌

堯舜一時輔佐其子孫咸有天下且膺一統之盛趙出伯益乃獨跨
帝軼王度劉越李而後興焉中數小竒天眷不釋挺生程嬰以左右
之史遷特書焜燿縑冊雖陰佑所臨似非人力然忠肝義膽要與日
月爭光又奚止丙吉陰德僅見當時而已哉烈士初心夫豈望報然
被其施者自不可忘也元豐紀號之四年五月始封嬰爲信成侯棟
宇宰木之蔭扁以祚德始血食焉中興行都用肇昭享蓋紹興十有
一年八月至十有六年六月加以忠節之號二十有三年二月爰命
頌臺議超常度爵以公冠以彊濟春秋二仲祭必用樂酌獻之曲蓋
曰成安備縉典也且統垂千載累聖相承民漸膏澤詠仁蹈德景炎

系隆運啟無窮原其端緒存趙之力爲多是旣不庸釋死而不朽無
踰義烈雖歷數千百載猶一日也英心廩廩如在其上膏雨旣濡秋
靈將肅時序物情人心忱焉俎豆告潔牲牲告備卽肖貌之宮迺肆
迺薦八音在列詩言義概夷惠之風懦立鄙寬形之千古如日常新
量幣旣奠縮爵旣告革木起壯金石將將絲管相叶而百禮暨矣祭
法有之法施於民勤事定國禦災捍患悉在尸祝之列矧公存孤利
浹萬世致其恪恭是宜有常中聲嘉號副茲縟禮聖王懋焉元封百
度厥端旣啟中興肇新有隆不替下貽億嗣甚盛舉也可無聲詩播
之金石頌曰皇乎趙宗嘗在晉國有孤幸存擠者如織帝曰念哉是
萬夫特將建殊勳覆露六幕卒存其祀險艱千億昔云託孤猶曰六
尺茲焉亡有遺腹是植豈無杵曰女命且殛圍謀竟售虐心遂熄此
爲其難委曲羽翼豈無韓厥卿位侯棘上薄雲天言烏可食外內叶
策則各有職惟嬰之義萬世赫赫歸告九原一死何惜執禮三年何
足酬德矧茲源流真人是出五閏厭亂四海乃闢垂統千載周道其

直六合廣矣閱世再百日被雨露膏潤無極時嬰之庸時嬰之力尸而祝之佐以皦繹夫尙何言是安是適青陽方中萬彙奮迹牲牲告脂春酒有羣思公之仁温温如日西顛將半思象悽惻黍稷告成祠廷載陟思公之義秋霜栗栗象德之音意緒昭白使遇季子維見歷歷俟今之樂風概可識勁氣堅節介焉如石才愧吉甫鋪敘髣髴

延喜樓冠帶河隴高年頌

唐宏覆海寓臣妾萬國太宗皇帝之兵有以俘頡利刊延陀滅高昌驛回鶻幾踏高麗而強弩之末終不足以振魯縞僅以俟君集一戰之力而和吐蕃玄宗鼎盛之日雖西方萬里之遠而一叛一服終不能得其要領乾元後隴右劍南西山三州七關軍鎮三百所皆失之憲宗嘗覽天下圖見河隴舊封赫然思經略之而未暇也及敵運之既衰尙恐患弄兵而吐蕃比於危亡矣於是鳳翔節度使李玘復清水收秦州涇原節度使康季榮復原州取六關靈武節度使李欽取安樂州邵寧節度使張欽緒復蕭關山南西道節度使鄭涯得扶州

是歲大中建號之三年也八月乙酉河隴高年千餘見闕下天子爲御延喜樓賜冠帶皆稽首易服昔漢宣帝能得呼韓邪之朝而卒不能得尺寸之地什伍之眾以有之晉劉裕西滅秦東滅燕有以舒華夏之氣而暫得復失皆未足爲曠古之功惟宣宗值此敵運之衰不勞兵革之用大刷祖宗之恥收久失之地而復屬中國之版籍其亦千載之一時也歟而今而後沙州祀祖父之衣服不必復藏也順憲二廟之諡號可以議上也偉矣夫其振世之大烈也歟土地人民之復雖乘吐蕃之弱兵不血刃而紀獨以爲吐蕃獻之傳則以爲諸節度之力通鑑所書與傳不殊今以爲據頌曰用夏變夷昔人有言天運不息恢若轉圜常與願違弗副而愆故爲希闊難遇之年巍巍冠帶聖明所宣中國是尙仁義則兼漢能服從來朝呼韓呼韓至歟金朱吉蠲然而猶曰單于爾專爾地爾民爾其保全越有華眾外方乃遷天開大幸旣隕腥羶復還古風儼若衣冠是真異事可書之篇唐有吐蕃頑狡莫鑄係纍吾民彼效裘氊子孫以傳敵運旣衰不勞中

權珙復清水秦州肆連乞乞季榮復州曰原兵威破竹連取六關李
欽勉旃安樂是還欽緒出車蕭闕亦奉終焉鄭涯得扶以旋八月乙
酉移御嬋娟延喜載臨載撫載憐謂汝中國昔日民編今墮邊地厥
心載悃天開帝曆帝曆綿綿反汝古服歡聲震天歡聲伊何躋我聖
賢聖賢所制帝王則然酬我心曲王化無邊彼之強敵飛灰滅煙昔
我沙州祀其祖先漢臘弗知淚涌若泉今其反初荷澤九乾荷澤九
乾有道平平躉矣斯舉大筆聯翩播在金石傳之億千

景靈宮頌

廟有寢古也漢之原廟其寢之類歟我真宗章聖皇帝大中祥符紀
號之五年戊午靈祖博臨於內宇景貺昭灼十有二月戊辰詔建琳
館誕將休嘉若唐太清太史言太微之南天廟十四星仰福帝居宜
卽已丙地創之共工鳩役九年五月以落成聞凡七百二十六區旣
更歷年仁皇出震奉真有殿英宗面離孝嚴紀名元豐鼎新十一殿
踵立蓋備帝后之奉嚴衣冠之陳矣元符三年十月甲子復於馳道

西游立宮館而神宗所御屹爲列首左右角立罔有不虔大典必告
首時必饗蓋亦超漢而軼唐矣帝王追遠之心無有窮已渙離萃聚
建之廟立之主精神之所憑依祀享之所肅敬猶以爲未足也又卽
儀容之可慕笑貌之可彷彿尸之於祭庶幾乎其若存焉繹之於祭
庶幾乎其或臨之仰迓靈祖之貺極淵源之所自不苟不倦是非仁
孝之純全其孰能與於此哉眞皇剏於前累聖繼於後原廟之不逮
古太清之不通今其皆瞠若者乎小臣不揆敢叶宮商播之金石頌
曰章聖明明百神受職北來西服五岳偃息叶氣所薰萬嘉如織乃
至靈祖有臨翼翼降祉如茨景貺罔極神休曷迓棟宇宜植以奉以
虔庶幾不忒共工庀官懋於夙夕殫其壯麗地開天闢仁皇繼照館
御規式承承自今或願昭格元豐鼎新欽成以畢徽皇大之右館角
立大報云初款謁無射吉禮旣成翠華親卽春溫秋霜寒暑來適凡
厥四孟罔不降陟迄成典常孝思是力儀容恪然有若親覲我其庶
乎建其萬一帝王之心有欲報德無或窮己方升之日豈無清廟日

昉曰祐精神所馮易言王假渙離萃聚各有所直聖人歎然以爲未
足載因靈祖景命有僕彪列羣祀虔加肸飾漢之原廟救過不給叔
孫一言其事僅亦敬愛所寓止於列辟豈若斯言淵源赫赫唐之太
宗巋然以獨天寶之侈何足控擊累聖弗及徒自光迹豈若斯宮本
末奕奕國家葺事永開簡冊純誠不已厥義昭自上不遺本昭穆畢
系小臣作頌播之金石

紹興秘書省觀累朝御製頌

臣仰惟國家休明之運聖聖相承典學不倦聰明冠倫之德緝熙日
就之功肆筆挾辭練冊充牣西清六閣內直紫楹森拱萬靈永貽億
禩重明繼照銳精紹述則必閱視相踵有隆不替猶以爲未足雲漢
之章奎壁之照下徹飭書林之表蓋跨經越史而凌躐乎諸子百家
使天下英賢預瀛洲之選者獲窺至理之萬一顧不韙歟高宗皇帝
投戈息馬篤意儒術成憲丕謨崇敬不忘乃紹興紀號之十有四年
七月二十有七日秘書省落成清蹕臨幸乃召羣工俾觀累朝帝藻

儒紳武袞濟濟將將寶軸琅函光彩煥發雜沓捍蹈爭先快覩忻所未見發坎井之陋啟醯雞之覆爰逮萬宇聳聞改聽猗歟盛哉先漢之君若高祖武皇過沛之歌秋風之詠聞見一二寂寥希闊旣不足道光武明章系隆鼎盛雖尊經崇儒有光西京東觀仁壽書林炳蔚曾不聞發越前作以侈觀聽唐文皇之集徒與乎開元四錄肅宗克復以來日不暇給茂焉潤色增光之事維我熙朝累聖作於前高宗述於後以內閣爲未足廣之以冊府之儲以寶藏爲未大繼之以榮觀之勝使數百年昭回之光一旦盡被物表文治煇興羣心知嚮誠復古之不緒酌祖之大端顧未有續文王之什作爲歌詩揄揚盛際小臣不揆敬三禱而獻頌曰國家之興叶於五緯奎爲文化天抉其秘重規疊矩出類拔萃錫汝保極達於遐裔猶曰未足敷言是事非文則侈非華足貴發揚隱奧萬物咸被重明繼照傑閣嚴邃龍圖而下盛名聿示曰爾近臣簪纓未戾新爾觀聽改爾瞻視虎拜稽首載舞載企復賜冊府增光於外唯務廣及豈唯寶閱瀛洲之英石渠所

萃亦獲蠡測大海之渌此其盛時莫敢少墜中興系隆投戈講藝鼎
新書林翬飛凌厲乃勅前驅清蹕臨蒞冠紳弁袈命駕不俟雜沓歡
欣開彼蒙昧六合九垓聞風服義過沛之歌秋風下暨寂寥希闡初
非極致矧彼復古東觀六備紹述無聞不幾廢棄文皇彌文列部之
四肅宗倥偬弗窺櫝笥維我列聖瞻前鮮儷堯舜禹湯承承繼繼煥
章重華有光奕世吐辭爲經斯文所係六藝雜沓不知其幾維我高
廟知風之自其幸後覺深識本意遺爾學者莫大之賜小臣作頌金
石不替

贊

元祐邇英閣仁宗皇帝御書贊

維天錫無疆大寶命於我有宋惟宋克肖天德藝祖太宗肇造統一
聖聖相承澤流愈深眞宗章聖皇帝垂裳九閏登封降禪固已媿隆
太和之盛矣仁宗皇帝重明麗天仁益豐義益熟刑惟恐不措斂惟
恐不薄四表九譯之達肖翹牙甲之微罔不涵泳德化帝心若慊猶

爲未足訪逮賢才容納忠直片善寸長靡不蒐獵期以永保盈成用
傳于億迺慶曆紀號之四年三月己卯御邇英閣聿煥奎牽凜尊祖
宗而下彪分臚列三十有五事皆保邦之丕範出治之宏綱副以危
言終焉顧勸講之臣度公亮安國洙曰朕觀書之暇取臣僚所言可
施於治者書以爲賜度等欽拜嘉錫請釋其義丙戌書成帝指大者
六事付之政地俾施行焉從古帝王蓋未有舍己從人樂取爲善若
斯之盛者也肆惟哲宗皇帝厲志紹述延登老成宰臣大防邇英有
請願揭書帷永用監觀詔音俞焉實元祐六年季春吉日道統一傳
若合符節彼唐太宗俯監人言嘗列屏障或黏殿壁然條目未備強
勉不終僅見於一時又未若前代後承之莫可及也宜有儒臣欽述
盛際謹昧死贊曰維天啟宋無疆大曆維宋克肖維天是則聖聖相
承先後弗易舍己從人盍分畛域於皇仁宗維明御極維仁益豐維
義益迪信及豚魚政如金石化成忠厚行葦共測泰運隆古重見赫
奕帝心若謙罔敢自逸俊乂四來忠讜迺繹迺拔其尤可施於國若

曰丕承祖訓是式若奉先業繼守翼翼精乎六藝尙吾儒術信義益
固巧詐不惑或廣視聽或求靜直小人之情俾無我溺驕盈當戒喜
怒當抑遠圖當講功則無迹矜民撫軍片善咸緝三十有五罔由己
出終以危言自儆自惕帝詎闕此式揚謙德親洒璇跼經臣特錫度
等羅拜厥義請釋六事俾行無厭無斃肆惟咨宗爰登鴻碩頓首有
祈施之經幄前遺後承光掩在昔唐宗容納或黏殿壁或列屏障有
昌莫述盍若神聖百載若一帝王大經彪分臚列小臣欽贊用播千
億

洛書五事圖贊

臣仰惟仁宗皇帝詔休大統克己承天越成洽熙懷謙履薄罔敢自
寧猶思倣切在躬取洛書五事寫以爲圖丕休哉自修之要道飾身
之格典也二儀同流人極中建形色天性咸具至理能者養之各有
其則統宗會元萬目畢振天昇彝倫神禹受之箕子歷陳越爲丕矩
初一五行委之自然次則敬用五事蓋人道之始也貌言視聽內焉

心思實一書之領會漢儒考古知德者鮮庶徵之來孰究厥奧維我
仁宗發千古之秘啟不傳之妙彪分臚列瞭若日星近取諸身先其
在我八政而下不行而至誠爲己之大端立極之奧理也鋪觀國史
洪範政監爲卷二十有四出自帝藻殆詳略之交備本末之相宣歟
厥後英宗皇帝常列洪範於欽明殿之屏重華繼文遙駿有聲中興
館閣書目仁宗御集一百卷圖與居其一焉度越流略作宋一經皇
乎偉哉小臣斐墨昧死祇贊贊曰人生兩間萬化紛紜盍執要端無
先一身曰貌固有養之在人厥德爲恭暴慢不侵以之作肅罔有弗
欽言從視明聽當遠聞咸適厥理毋汨毋湮妙若心思中乎天君睿
以作聖所造孔深龜文出洛有妣至神具列九疇光明郁紛其樞維
何次二所陳反躬之會眾妙之門行政紀疑徵福之分是皆外物殆
胡足論有若三德若邇若親猶曰治人朝己之真有若皇極斂福錫
民切問近思殆我之因維我仁宗其温若春請事斯語復禮爲仁曰
敬曰用陰會默存知言之要諗乎斯文昔焉政監大義若綸皇曰茲

詳無膏以淪爰寫斯圖萬世之珍道不下帶厥效孔殷標曰洛書探厥攸元妙訣不傳千載一辰厥義惟新小臣欽贊并用書紳

武成王十哲蜀丞相諸葛亮贊

唐上元元年尊太公以王爵諡曰武成俾其宗主用武之教如文之宣尼祭典一同樂用軒架復以歷代良將爲十哲像坐侍蜀丞相諸葛亮實居第三夫文武之途至唐始歧爲二事蓋將肖其形貌施之丹青書之姓氏官爵以昭示後世爲永遠觀美此豈苟然哉惟亮身起三顧治善八陣擇劉氏而事之出師一表皆至公盡誠之言雖崎嶇蜀漢而其事躋矣其義著矣況用兵行師蓋威文節制之流亞足以服孟獲斬王雙仆張郃而其旣死也猶足以走生仲達屢戰屢勝天不假年巾幗之遺方行而蓋棺之事已定夫豈人力之所能及哉侑食武成之庭而配孔門十哲之列宜也夫使後世想其風采人不可存名則可存身不可固象則可固欽贊以遺之億千是可後乎哉後之人入武成之堂瞻諸葛之貌而誦斯贊也其有益於英雄義烈

也豈小補乎哉贊曰漢之季世四海鼎足蜀居其間尤小而蹙諸葛
用之抗守如欲孟獲崛起強七禽以覆仲達勅敵亦畏而服而況他人
皆輒敗北節制之師如日之煜不幸天年天焉如條使其義襟不振
不縛使其英烈不年不祿維唐遴擇以標以錄視之十哲威略振俗
我肖我貌載尸載祝俾配武成尙論以篤參之羣彥覆以厦屋後世
觀之化成自速寫此儀形視之武毅俾之烈烈俾之肅肅俾之想象
存其心曲維茲宣聖私之以淑維茲十哲四科之目示之後世白不
日浴今之大柄各司其局一張一弛英才並育以垂永年齊人是告
欽贊樂石用昭武塾

真宗皇帝御製內香藥庫詩贊

內香藥庫者古玉府也獨以香藥名者不貴異物賤用物也上以備
服御之須下以裨經費之闕犀珠磊落粲然溢目梯山航海訖惟人
面罔不虔職貢之修盛舟車之湊越自肇造日積月累柴周之所儲
嶺蜀之所聚銖收寸藏殆非一日至於我真宗章聖皇帝之年蓋二

十有八庫焉維帝緝熙唐文形之篇什字爲一室之標親灑璇跗肆
筆成書金榜昭揭下被萬古雲漢成章夫豈徒然哉由盛帝明良之
歌若三侯之章秋風之什見於載籍者不可屢數求其克勤小物無
一之或遺若我真宗章聖皇帝者蓋千萬世不一見也其事不見國
史獨夢得石林燕語存其梗概而歲不具焉容光必照日月之輝已
小臣敬贊盛德之萬一贊曰皇家之興五緯若繩若繩貫珠降婁是
明降婁何職比於東壁文物之占天意歷歷累聖承承宸章方增九
閣垂象眞星最稱汗牛充棟其書總總克勤小物罔不鼓動玉府在
周遺規可求服御是供一職以修冠以香藥其名何作不貴異物厥
義坦若四七其門臚列彪分扁以宸章理則具存維玉至寶及他玩
好茲焉是藏儲之於早亦有南琛四方同文訖惟人面職貢繽紛旁
暨良藥痒痾可却拔象之齒擢犀之角罔不粲然溢乎後先標以唐
文相映相鮮是謂玉食以奉維辟冢宰不會宏哉九式叶於四聲七
字一精柏梁之餘肆筆而成如彼列宿麗天昱昱揭示萬世漢將之

目聖作爛焉永示萬年

神宗皇帝御製祭狄青文贊

寶元康定間羌動銀夏時以偃戈之久戎備小有未諳諸將折北不支獨狄青起行伍擐旗摧鋒擅百勝之威名振青海羌旣知因有稱藩來王之漸仁宗神文皇帝用釋西顧之慮而青之名字簡在宸心至命繪者圖之丹青貌其體肖爲圖來上以快鼓輦之思我神宗皇帝憤西北二敵未汔歸者遽興頗牧之思嗟九京之不可作親御綈几雲漢之章追酌忠魂華袞之褒五色下被烈士知勸懦夫可激而立也夫一介之善不惟見用當時猶使後世明主起當饋之歎其風烈言言真可尙也祓飾厥文敬贊下方小臣其敢辭贊曰蠢爾四裔曷爲之備必也虎士戎容暨暨功見於先後王惕焉宜有袞袞被之九原昔者我國有戎西極敢曰叛渙稱爾矛戟屬其一時武臣小熙赴赴烈將折北不支狄青乃出捐軀効力所向無前踏賀蘭石當寧載咨丹青其儀其儀鷹揚登於天墀烈烈神廟如日之暉憤彼叛渙

期至天討思力及臣迺拊忠魂親摘宸藻見之唐文唐文偉已壯士
增氣至於懦夫亦有立志頗牧是思古則有之不聞親作下被昭回
帝王有製意各有爲厥意若何漢封樂毅黃金築臺英士聿來意之
所見罔不宏哉維青良將帝所嘉尙英魄如在倘其胥蠶氣吞驕戎
事昭雋功百世之下凜焉清風宸章眾矣是豈其最小臣欽贊以錐
測地

損齋記贊

臣仰惟高宗皇帝身濟大業息馬論道治符昌泰不自滿假永惟中
興以來勞來安集無所不用其至猶懼一天不獲其所載惟益下之
方殆莫要於克己乃闢齋居名之曰損一切屏去聲色玩好聖經信
史終日諦繹復攄帝藻發揚聖蘊寫之琬琰以自儆切迺紹興紀號
之二十有八載仲冬之月權吏部尙書臣允中造膝有請願攄盛旨
播之詔告以幸天下玉音俞焉爰因斯文徧賚僚辟外及賜履持節
之臣璇跼所親庸秘冊府羣情歡感咸仰盛德丕赫哉保治之宏模

帝王之盛節也損之義大矣爻象十翼三陳九卦反覆明辨厥理淵
微帝心獨得聖不自居休稱揭厲緝熙光明有隆不替修身及家平
均天下見之事業不一而足統垂千歲業昇萬禩聖子神孫累世一
轍恭儉是保益迓平康前遺後述亶其盛哉小臣不揆作爲聲詩欽
述盛際仰依樂石之末光謹昧死贊曰若稽古初博考載籍義理之
會無過大易卦六十四損居其一三陳反覆曰修于德於皇高宗系
隆炎曆廟謨雄斷大業再植投戈息馬索隱探蹟盛治日隆泰和曷
奕不以旣濟忘其儆惕爰究爰討是法是則皇心闡幽齋室以闢一
切屏去翫好聲色曰經曰史是崇是式萬幾多暇燕閒恭默朝斯夕
斯不外一室迺推聖意發之翰墨雲漢昭回襲六爲七寫之琬琰大
書深刻實曰自省豈欲外觀二十八禩中冬之律臣曰允中言發造
膝帝曰俞哉賚爾百辟外逮持節十連方伯欽拜嘉錫洽於肺臆璇
跗所親冊府是錫猗歟斯文自克自抑垂諸無窮布在方策聖子神
孫恭儉千億揆厥攸元貽謀歷歷小臣欽贊副於樂石

靈巖集卷五

靈巖集卷五

十一
夢
選
靈巖